

# MUTWISHIIBWE PASHIISHE

## MUSHÀÀLE MWENA BWALU



Twasàkidila, wa manza tètè, Mwanèètù Parker.

Mwoyi wènù awu dilòòlò edi, balundà bàànyì. Mbímpè bwà kwikala cyàkàbìdì kaaba aka dilòòlò edi. Nènku ndi ngèèla meeji nè nudi bacyòke bwà kwikala basòmbe, nuntèèleja. Nènku ndi—ndi mucyòke bikolè be, dîyì ndimpàte ndambù ku kuyiisha bikolè nùnkù.

<sup>2</sup> Ndi mfùma ku dyakula nè Mwanèètù Parker kwàka, nè mmwambila nè ndi ngèèla meeji nè edi ke òmwe dyà ku masangisha à matàmbe bwímpè adi Mukalenge mundekele mbwelamù kùkaadi ntàntà mule. Kadìvwakù dinène to, nudi bamanyè cìndì muswè kwamba aci's, kî nditàmbe bunène to. Kakwènakù bààbúngì menemene bàdì bàbwelamù to, kàdì ngiikàdìlù wa—wa—wadi, òvwa dilenga dyà dikèma. Diitabuuja, ekèlekèle, mbimwèke ànu bu nè cintu kanà cyònsò cìdì mwà kwenzeka. Mémè ntu munangè disangisha dyà mùshindù awu mùdì udyùmva ànu nè cintu cyònsò cìdì mwà kwenzeka pa dìbà kanà dyònsò. Nè mémè—mémè ntu munangè aci. Nè ndi mutwishiibwe nè nekwìkalè bipeta bìikale mwà kunènga, nè byòbì abi nebidileejè.

<sup>3</sup> Ncyà bushùwà nè ndi ngàanyisha lutùùlù lwènù bònsò, basòmbe, munkaci mwà kuntèèleja nyiisha munda mwà mèbà, nè pashiishe kwalukila dilòòlò didì dilondà. Ncyà bushùwà nè nudi mwà kutwàla dinyooka dyàbúngì. Nwamònu anyi? Pa nànkù ndi. . . Ndi mumanyè nè nudi nè lutùùlù lwàbúngì. Pa nànkù tudi. . .

<sup>4</sup> Ndi muswè kwamba, bwà twètù bònsò nè, tudi nè kusàkidila kùdì, Mwanèètù Thomas. Ncyèna ànu mwà kujikula njiyà yànyì bwà Mwanèètù Thomas to. Yèyè, mvwa ndyàmbidila nè mvwa mumumanyè, kàdì mvwa mumubwelàkàje nè muntu mukwàbò. Mémè kupeta mpùngà wa kulabulangana ku cyanza nè mukàjèndè mukesè, wa mushinga mukolè. Nènku bàdì bulelèlè basadidi bàà Kilistò. Nè ncyà bushùwà nè ndi ntèkemena nè, bu Nzambì mwà kwanyisha, bwà nè tujila twètù netùtwilanganè, misangu mikwàbò yàbúngì, mu nsòmbelu ewu.

<sup>5</sup> Bu ngiikala nwènù, nè musòmbèle pabwìpì apa, ekèleeziyà wendè mmufwànyine kwikala kaaba kàndì mwà kwikala nyà. Pa nànkù mémè—mémè ntu muswè muntu udi. . .

<sup>6</sup> [Mwanèètù Parker Thomas ùdì wàmba nè: “Ncyèna muswè kwimanyika Mwanèètù Branham mùshindù ewu to, kàdì ndi ngèèla meeji nè nebiikalè ànu bímpè mu mpùngà ewu.

Ndi mmusàkidila bwà méyi à kààlumbandi awu nè bintu bilenga bivwàye mwâmbè abi. Mvwa ànu ndikonka bwà bantu bàdi pabwîpi apa, nè bônso bàdi munkaci mwà kulwa mu mpungilu ewu, ní mbaswèku bwà yéye kwalukilaye cyàkàbìdi. Nudi nwamba bishi bwà aci? Bantu bônso mbaciswe anyi?" Disangisha didi dítuuta bikàshi—Muf.] Twasàkidilaayi. ["Mu bulelèlè, nudikù mwà kuswa bwà yéye kwalukila mu ngondo wa kabàlànshìpu udi ulonda ewu nè—nè kusòmbakù neetù anyi? Nwènu baswè, juukilaayi kuulu. Èyowà's." ] Twasàkidilaayi. ["Èyo. Sòmbaayi." ]

<sup>7</sup> Twasàkidilaayi, wa manza tètè. Abi's mbilenga byà dikèma. Twasàkidila, Mwanèètù Parker. Ndi menemene... [Muntu kampàndà ùdi wàkula nè Mwanèètù Branham—Muf.]

<sup>8</sup> Mmwâmbè nè mfrangà yônso mmifuta, nè bikwàbò byônso. Tudi twanyisha dyelangana dyènu dyà mu dibòkò dilenga, dikwàcisha, bwalu, nudi bamanyè's, bìdi bilòmba mfrangà bwà kwenza mpungilu eyi. Nè pa nàнку byônso mbifucìbwe kujikè. Abi's mbilenga be. Tudi ànu nè kusàkidila. Byônso, munda nè pambèlu.

<sup>9</sup> Mukalenge mmusùngìle, mwondòpè, nè byônso mbyenzèke, pa nàнку tudi ànu nè disànkà dyà kwikala cidì . . . kumòna cyòci eci. Ndi ngùmvwa bibì bwà kumòna disangisha edì dyènda dijika. Kàdi dyòdi nedyàlukile cyàkàbìdi ku . . . Paanyimà pàa matùkù, mu bikondo bicilwalwà, netùmonè bipeta.

<sup>10</sup> Mpindyewu tudi baswè kusàkidila muntu yônso kàbìdi bwà, ndi muswè kusàkidila, bwà màtàbishì makesè anùdi bantùmìne mu cikondo eci awu. Ndi ngàanyisha aci bikolè, bikolè be.

<sup>11</sup> Nèнку mpindyewu, tukàadi tupweka mpindyewu bwà kukùmbula Mwanèètù Bigbee mu Caroline du Sud, Colombie, Columbus, mu Caroline du Sud. Nèнку nebigèngelè bwà twikalèku màalabà dilòlò nè mu diibìdi dilòlò, nè Mwanèètù Bigbee. Pashìshe tuyàaya ku Côte Ouest.

<sup>12</sup> Ndi muswè kunùkonka, nè pashìshe, kuumukila aku, ngèèla meeji, paanyimà pàa twètù bamanè kujikija kàpanyè aka kuntu kwàka, ndi muswè kuya ku Àfrikè, ku Australie, ku Nouvelle Zélande, nè kwônso aku. Ndiku mwà kulòmba masambila ènu bwànyì mèmè, bwà Nzambì wànkwàcishakù anyi? [Disangisha didi dyamba nè: "Amen."—Muf.] Nèнку twasàkidilaayi wa manza tètè.

<sup>13</sup> Nèнку tudi nè kusàkidila kwàbùngì bwà bintu byônso. Ndi ngamba nàнку bwànyì mèmè mwinè nè bwà bantu bàa mu tabernacle bàdi kaaba aka aba. Ndi nè bèètù . . . anyì bàmwè bàa ku balubuludi bèètù kaaba aka, nè balami, nè bàmwè bàa ku balundà bàanyì bàa kuntu kwàka.

<sup>14</sup> Mpaasàtà wetù ùdi kaaba aka. Ncyenàku mwànji kufika ku dimòna Mwanèètù Neville to. Ngèèla meeji nè bàkaadi bamuleejè. Mmwòmò anyi? [Mwanèètù Parker ùdi wamba nè:

“Èyo.”—Muf.] Èyo. Mwanèètù Neville. Udi penyì, Mwanèètù Orman? Ncyèna ànu mwà kumòna mwaba ùdì to. Nènku, kaa, ekelekele! Paanyimà pàapa, ànu munène’s. Bànda kunweku bwà katanci kakesè.

<sup>15</sup> Muntu ewu, ndi mumanyè nè mmusadidi mulelèlà wa Kilstò. Yèyè’s ùvwa Méthodiste wa mukùna-ku-dikàsà, kàdi pashiishe kupetayè Nyumà Mwímpè. Mpindyewu yèyè m’Méthodiste wa Nyumà Mwímpè. Ki mpaasàtà wetù wa mushinga mukolè ewu.

<sup>16</sup> Ndi muswè kukulabula ku cyanza, Mwanèètù Neville. [Mwanèètù Neville ùdì wàmba nè: “Twasàkidila. Nzambi àkubènèshè. Mbímpè bwà kukumòna.”—Muf.] Twasàkidila. Kùdi myaba anyi. . . ? . . .

<sup>17</sup> Ndi mumanyè Mwanèètù Neville kùkaadi bidimu, nè mukàjèndè mukesè mulenga awu, kumpàlà mene kwà kusèlanganabò. Kàdi mu bidimu byònsò bìndi mumumanyè ebi, yèyè kí mmushintùlùkeku nànsha kakesè to, cibì mmutàmbe kubàndishiibwe mu Nzambi. Kwàjikì. Kàdi’s mmuntu wa kweyemena. Tudi bamunangè mpindyewu bu mpaasàtà. Ki cidiye kùkaadi bidimu, nè tudi batèkèmene nè neàshaalè too nè pààlwà Yesù, cyòci ciikàle diswa dyà Mukalenge.

<sup>18</sup> Nènku udikù mwà kuswà bwà kwambila bantu díyi kampàndà anyi, Mwanèètù Neville?

<sup>19</sup> [Mwanèètù Neville ùdì wàmba nè: “Èè, ncyà bushùwà nè ndi musànkishiibwe be bwà kwikala pàmwè nè muntu mwímpè wa Nzambi ewu, cidi bwànyì dyèsè bwà mukudisanga nendè munda mwà bidimu dikùmi ebi. Ncyèna mumanyè ní ndi muvwijìbwe Gehazi mwímpè, anyi to, kàdi ndi muteetè bwà kwambula dikombo bwà muntu wa Nzambi ewu. Yèyè ùdì bwànyì mutàmbe nè mulundà. Yèyè ùtu, mutùdì mwà kwamba, taatù mu Èvànjeeliyò, bwànyì mèmè, kàbìdì, nànsha mùndiku mumupite ndambù ku bidimu—Muf.]

<sup>20</sup> [“Kàdi, nànsha nàнку, ndi mutàmbe kusànkishiibwa, kàbìdì, bwà kwikala mu disangisha edi. Cintu kampàndà ncinkwàte mu Southern Pines emu, mu mùshindù wà nè ndi munangè mwaba ewu bímpè byà kacya. Nè mmunsànkishe bikolè bitàmbe. Ndi mumanyè nè Nzambi ngùvwa mwenzèje bwà ngàakùmbanaku mwà kulwa mwab’ewu bwà kwikala nè Mwanèètù Branham mu disangisha edi. Pa nàнку, ndi musànkishiibwe bikolè be mu diikala mwab’ewu, mu mùshindù wà nè bintu mbyenzèke bikùmbànàngàne menemene nè bilenga be, mu mùshindù wà nè ncyèna ànu mwà kutùmbisha Mukalenge bikùmbàne mene, dilòòlò edi to, bwà byònsò ebi.]

<sup>21</sup> [“Kàdi, kumutù kwà byònsò, mvwa mwàmbè, pàmvwà ndwa mwab’ewu nè, kùdi cintu cimwèpelè cidi citàmbe kutùmbuka mu disangisha dijimà edi bwànyì mèmè, nè ciine aci n’Diyi dyà Nzambi edi. Amen. Ncyèna muswèku. . . Mèmè

nciyi mumònekù muntu mwondòpiibwe, mèmè nciyi mumònekù muntu ùsambidila babèèdi, Nzambi Yèyè ànu mutungunúke nè kumpà Dìyi Dyèndè, kùdi disànkà dìdi dyuja musùùkà wànyì, nè kuumukila mwínshì mwà makàsà àànyì too nè ku lusongo lwà mutù wànyì, Dìyi dyà Mukalenge edi. Nènku, amen.]

<sup>22</sup> ["Ndi musànkishiiibwe mùdi Nzambi mmubènèshe, musadidi nè mupròfetà wa Nzambi wetù ewu. Nè ndi múmvwè Dibènesha difùmina kùdiye dilwa kùndi eku, pa nàнку ndi nè disànkà mùndi nsanganyiiibwa mwab'ewu. Ndi ntèkemenà nè nwènú bònsò nudi búmvwè cintu cìmwècìmwè cìndi múmvwè aci, mu masangisha aa. Nzambi mmubènèshe bulelèlè musadidi Wendè mwab'ewu mu kaaba aka. Cìdi cyenze nè mmanyè aci, yèyè's mmucyakùle mu katanci kakesè emu. Nè bintu binènè nè byà bukolè bitùdi bapetè mu Diitabuuja, dilòlò edi's!]

<sup>23</sup> ["Taatù, Bible ùdi ùtùlongesha nè, kabyèna bitùkèngela bwà kwikala nè bintu bìdi bimwènèka nànsha. Cyònsò citùdi tukèngela, patùdi tusambila, twitabuuja, nènku tukàadi bamanè kubipeta. Amen. Ndi naabi mpindyewu, bwalu ke mùshindù wùdi Bible wàmba nè ngùdibi. Nènku ndi musànkishiiibwe mu cyòci aci, bwalu Nzambi ùdi wènzela bintu bilenga ebi, ku mpaasàtà wetù, musadidi nè mupròfetà wa Nzambi ewu, Mwanèètù Branham. Nènku Mukalenge yikalèku ànu ùmubènesha nè àtungunukè nè kumulama mu Njila ewu. Mukalenge àtumbishiibwè!"]

Nzambi àkubènèshè, Mwanèètù Neville, byùmukila mu mwoyi wètù wònsò.

<sup>24</sup> Mpindyewu, nudi bamanyè's, paùdi uya ku pikiniki, bu muntu kampàndà mwà kujiika kaamucì mwaba kampàndà, èè, kwèna mwà, kwèna mumanyè ní kàcidipù anyi to, wamònu's, bwalu kàvwa katèèkiiibwe mwaba awu, kajiikapù, anyi cintu kampàndà. Kàdi paùdi mumanyè nè kùdi lusànga lwà kale lùdi kacya ànu lwàshààla lwimàne, udi mwà kwela meeji bìmpè menemene bwà kuya kasòmbakù mwínshì mwà mucì awu nè kwikisha. Awu's m'Mwanèètù Neville, ànu wa mwomùmwe ditùkù dyònsò edi, kacya ànu wàtungunuka. Pa nàнку ndi nè disànkà dyàbùngi bwà bwalu abu.

<sup>25</sup> Tudi nè—tudi nè mwanèètù mukwàbò kaaba aka, mpaasàtà mukesè, umwe wa ku èkèleeziyà myàna yètù yà mu èkèleeziyà kuntu kwàka. Yèyè kàyi ùlwa apa to, ndi muswè àjuukilè kuulu, Mwanèètù Junior Jackson, mukwàbò Méthodiste mùle tètè nè Nyumà Mwìmpè. Junior Jackson, udi penyì? Mwanèètù Junior Jackson, Méthodiste, mùle tètè nè Nyumà Mwìmpè. Nyèyè ewu, *kaaba aka* mene, Mwanèètù Jackson. Udi muswè kwamba cintu kampàndà, anyi cyònsò cyùdi muswè kwamba aci anyi? Èyo.

<sup>26</sup> Mukwàbò ewu m'Mwanèètù Palmer, mukwàbò wa ku bânà bèètù kaaba aka. Udikù mwà kujuukila ànu kuulu anyi,

Mwanèètù Palmer? Mpaasàtà wa ku Macon kwàka, mu Géorgie, ngumwe wa ku balundà bèètù.

<sup>27</sup> Nè Mwanèètù Fred Sothmann, ndi mumanyè nè ùdi kaaba aka. Yèyè ngumwe wa ku balubuludi bèètù mu èkèleeziyà. Udi penyi, Fred? Mwaba kampàndà mund’emu, mmusòmbèle lwà paanyimà pààpa.

<sup>28</sup> Mwanèètù Banks Wood, udi penyi, Mwanèètù Banks? Yèyè ngumwe wa ku balubuludi bèètù bakwàbò, lwà *mwab’ewu*.

<sup>29</sup> Mwanèètù Banks ùvwa Ntemu wa Yèhowàh, nudi bamanyè’s. Nè yèyè wàkalwa mu disangisha, nè ùvwa nè mwànà wa balùme mucibùkile panshi, David, mukòlò wèndè mudikònye, bwà tunèkè. Nè mvwa mu disangisha dyà mu ntentà, nè kumpàlà yèyè ùvwa mumòne. . . Ùvwa ku—ku Dallas kwàka, dilòòlò adi. . . anyi, mu Houston, pàakapwekà Nyumà Mwîmpè mu mmwènekèlu wa Bukênkè abu awu, nè kuBùkwàtabò fòtò. Mwanèètù Wood ùvwa kuntwaku. Pa nàнку, ncivwa mumumanyè dîbà adi to. Pa nàнку ùvwa mungwije mfrangà mikùmbàne. Yèyè mmwibakidyanganyi wa nzùbu. Wàkalwa ku disangisha dyàkalondà adi. Mémè kuya dyàmwàmwà dyà mbù, kuumukila aku, nè kuya ku disangisha divwà dilondà. Ùvwa nè mwanèndè wa balùme mucibùkile panshi awu, kùdi tunèkè. Kàdi patùvwa. . . Mvwa mwimàne mwaba awu mwînshì mwà dilaabiibwa dyà Nyumà Mwîmpè, kwalukilaye mu musùmbà wà bantu awu, è kwakula nendè. Kumwambila byònsò bwà bwalu abu. Kumwambila bwà kwimanayè kuulu.

<sup>30</sup> David, udi penyi? Udi kaaba aka, dilòòlò edi anyi? Èyowà. Mwànà wa balùme uvwa mucibùkile panshi awu, n’yèyè wàwa. David, piikalà bantu kabàyi biitabuujà nè Nzambi udi mwà kwondopa muntu udi nè mukòlò wèndè mukònyangaja kùdi tunèkè, nè bikwàbò to, ndi njinga bwà wèwè kwendakù ànu mwab’awu, bwà katanci kakesè cyanààna, bwà kubàleeja mùshindù wùdi mwà kwenda. Èyowà. Èyowà. Mwab’ewu, kabýèna ànu bwà kwenza dileeja dyà ku bantu to, kàdi cidi ànu bujaadiki. Tàngilààyi, nwamònu’s, kaaditebuka nànsha kàmwè anyi cintu cikwàbò nànsha cimwè to, wònsò mwalùkile mwàwù nè kale nè mwondapiibwe. Nwamònu anyi? Ncilenga bulelèlà, bulelèlà, cidi Mukalenge wetù mwà kwenza. Mpindyewu, piikalàYe mwà kumwenzelakù cyòci aci, mòna’s, Yèyè’s neàcyènzèlè muntu mukwàbò. Nwamònu anyi? Pa nàнку, bushùwà, bu twètù ànu mwà kupeta diitabuujà dyà mùshindù awu.

<sup>31</sup> Mpindyewu, mu bushùwà bwà bwalu, nwènù bònsò nudi biibidilàngàne nè, bamanyè Mwanèètù Ben udi lwà kwînshì eku. Yèyè ùdi ànu. . . nudi bamanyè’s, muntu ewu unùdi mwà kuumvwa kumutù kwà bantu bònsò, wàmba nè: “Amen.” Nènnwambilè kakesè. Ndi ngumvwa bibi bwà kwamba eci bwèndè yèyè; mùdi mukàjèndè musòmbè mwaba awu.

Twètù bônso tudi banangè Ben. Nè cìvwa nkumpàlà kwà kusèlanganayè. Mvwa nsanganyiibwa ku Côte Ouest. Nè mwàna wa balùme awu ngwa ku sud wa Indiana.

<sup>32</sup> Mvwa nsanganyiibwa kuntwaku mu Côte Ouest, ànu ngènda nyiisha, mwimàne kuulu mu dilòlò kampàndà, mu Cibandabanda cyà San Fernando, cibandabanda, nè ba-Baptistes, ntentà munène mùle tètè nè bantu. Mpindyewu, bàdi bu bantu bapilùlùke, nudi bamanyè's. Mémè mvwa ànu mutungùnùke nè kuyiisha. Dyàkàmwè mémè kuumvwa mukunda; cisuba cyà nsukì mifiike, yinyùkuka, bu—bu—bu—bu mwena Mexique kampàndà; makàsà manène àbìdì meela muulu mu lupeepèlè; byanza byèndè mùshindù *awu*. Mémè kwimanyika. Mémè nè: “Ben, uvwa mupàtùkile penyì mwab'ewu?” S'ki yèyè awu.

<sup>33</sup> Nzambì àkubènèshè, Ben. Wèwè mwà kjuukila ànu kuulu cyanàànà ndambù, juukilà ànu kuulu cyanàànà, wèwè nè mukàjèèbè. Tudi baswè ànu bwà bantu ku. . . Mwanèètù Ben, awu's ke uvwa wutwà “amens” yònsò ayi mu *edi* ditumba mwab'ewu. Nzambì àkubènèshè. [Mwanèètù Ben Bryant ùdi wàmba nè: “Tudi dijinga nè masambila èbè ónsò. Tudi batwishibwe nè netwàlukilè mu budimi bwà bwambi, mu matùkù makèsè emu, mu mikùna mwàmwa, Mwanèètù Branham.”—Muf.] Amen. Nzambì àkubènèshè.

<sup>34</sup> Mwanèètù Way, mpàndànjlà mukwàbò, ùteeta bwà kuseba njila wa kuya mu madimi à bwambi. Yèyè ùdi neetù, dilòlò edi. Tudi bamumanyè. Mmusòmbèlè kwètù eku bwà katanci kakesè. Udi penyì, Mwanèètù Way? Udi mu disangisha emu anyi? Ànu *apa* mene, nè mukàjèndè. Nènku mpindyewu, ndi nzwàmabila nè, mvitá yìvwà pankaci pàà Angleterre nè Norvège mmijikè. Yèyè's ng'Anglais, nè mukàjèndè's mmwena Norvège. Kwajiki. Bantu bàà maalù malenga. Èyowà's, mukalenge. Mvitá mmijikè yònsò.

<sup>35</sup> Mwanèètù Boze ùvwa kuntwaku, dilòlò adi, munkaci mwà kuleeja fòtò wendè, wàmba nè: “Kaa, èè,” mwàkambàye, “kùdì muntu mukàjì kampàndà. . .” Awu's m'Mwanèètù wa bakàjì Sothmann. Nènku mvwa njinga bwà imanèku kuulu, nè Fred, lwà apa mu mwaba kampàndà. Bantu balenga bàà dikèma. Nè yèyè awu's mmwena Norvège. Mu bushùwà bwà bwalu, Mwanèètù Boze ùdi—ùdi mwena Suède. Ke kwambayè nè: “Hum! Hum!” Nudi bamanyè mùtù Joseph wènza's. Yèyè nè: “Kùdì inàbànza kampàndà mwab'ewu, mwanèètù wa bakàjì kampàndà,” mwàkambayè, “mmwena Norvège.” Yèyè nè: “Mu bushùwà bwà bwalu, wèwè kùyì mwà kwikala mwena Suède to, mbìmpè kwikala mwena Norvège.”

<sup>36</sup> Patwàkapàtùka, kuntàngilayè. Ke mémè kwamba nè: “Mu bushùwà bwà bwalu, Joseph, mbibì be mùdìbo kabàyi mwà kwikala bônso ba-Irlandais, beena Irlande to.” Nànku twètù bônso tutu nè ndambù wa minèkù kuntwaku.

37 Mwanèètù Higginbotham, udi penyi? Lwà mwaba ewu mwaba kampàndà, èè, muntu mukwàbò wa difwànà dyà Nzambì udi ufùmina lwà kwètù eku. Umwe uvwa mulubuludi mu èkèleeziyà mwàmwa, munda mwà bidimu nè bidimu. Nè mulundà wendè, Mwanèètù wa bakàjì Arganbright, Mwanèètù wa bakàjì Ruth Arganbright, lwà kaaba aka mene. Ngèèla meeji nè mmusòmbe lwà mu kajila emu. Juukilà kuulu. Mbanganyì bàdi bamanyè Minor Arganbright? Umwe wa ku bamfùmù cindondà bàà Beena Kantu-ku-byanza bàà Èvànjeeliyò mu Kaabujimà, mwànà wa tatwèndè mukwàbò.

38 Kaa, ekèlekèlè! Mémè mupangile mwà kutèèla nànsha umwe wa kunùdi, ndi—ndi nè disànkà bwènù nwènù, muntu nè muntu. Ndi nè disànkà bwà munùdi neetù mwab'ewu. Katwèna bamanyè to, mutùdi tubwela nè tupàtuka. . .

39 Mwanèètù wa balùme nè Mwanèètù wa bakàjì Dauch bàdi basòmbe pààpa bàba, bóbò pààbò, nè Mwanèètù wa bakàjì Brown, Mwanèètù wa balùme Brown.

40 Mwanèètù McKinney, muyiishi mukwàbò wa ba-Méthodistes mwikàle nè Nyumà Mwímpè. Udi penyi, Mwanèètù McKinney? Udi penyi, mu nyungulukilu emu? Yèyè's ngwa ku Ohio kwàka. *Apa*, lwà paanyimà apa, mukwàbò wa mupayàme, mulediibwe mu Diyì edi, Méthodiste musuùlùke ku byònsò. Ncyà bushùwà. Mpindyewu, ùdi nè dibàtiiza dyà Nyumà Mwímpè, ùdi wènda ùya mutàngile kumpàlà bwà Nzambì.

41 Pat Tyler, mukwàbò mulundà wanyì wa katàpùlà-katèèka mmusòmbe lwà apa. Mwanèètù Pat, juukilà kuulu. Nwènù bònsò's nudi bafwànyine kumanya Pat Tyler. Twasàkidila, Mwanèètù Pat. Nzambì àkubènèshè. Yèyè ùvwa mùyààpàndì, mwambudi wa bingoma, mushipyanganyi. Nzambì wàkamusùngila nè wàkamuvwija munsantu. Udi wènda wimanyika mashinyì mu ditùnga dijimà, bwà kulonda masangisha nè bikwàbò.

42 Nudi bamanyè cìndi ngèèla meeji bwà bantu aba, kùvwàbò bafùmìne anyi? Ngèèla meeji ku Ebèlù, nshapità wa 11: "Bààkabàkòsa bitùpà nè scie, nè bààkalalakana bavwàle bisèbà byà mbùji nè byà mìkòòkò, bàdi bàà pa buloba kabàyi bakùmbànyine to." Bònsò bàdi bàfila bujaadiki bwàbò.

43 Tom Simpson, Tom ùdi penyi? Mmulwè anyi? Mvwa ngèèla meeji nè mvwa mumòne kàshinyì kèndè pambèlu apa. Yèyè nè díkù dyèndè, mvwa ngèèla meeji nè yèyè ùvwa kaaba aka. Pàmwàpa mvwa mutùpàkàne. Èyowà. Udi ùjuukuluka nè ùpwekelela bu cìshi ku nshinga wa ndòbo nè: "bum-bum," mùshindù awu. Èyo.

44 Mukalenge ànùbènèshè bònsò. Tudi nè disànkà dyà kwikala kaaba aka. Bakwàbò bàà ku Géorgie mbòbò aba, bàà mu myaba mishiilèshiiàngàne. Nènku tudi nè disànkà dyà munùdi bònsò kaaba aka, nè bwà kutwilangana, nè balundà bèètù bàà kale.

45 Ndi munkaci mwà kutàngila Mwanèètù wa bakàji Peckinpaugh wa ku Chicago anyi? Mvwa ngèèla meeji nè mvwa mumumòne. Nè Mwanèètù wa bakàji Little, nè pabwípì nendè apu, nè—nè Mwanèètù wa bakàji D'Amico, bantu bananga, bàà mushinga mukolè bàà ku Chicago, kasumbù kàà bakàji bàdi batàmbe kwikala bàà mushinga mukolè kùndi abu.

46 Nè bakwàbò bàdi basòmbe mwab'ewu aba. Mwanèètù wa balùme ewu, ncyèna nànsha mwà kuvùluka dìnà dyèndè to, nè ngwa ku Géorgie kwàka mu mwaba kampàndà. Ndi . . . Bònsò abu, kaa, ekèlekèle, bàdi ànu bu bàdi myaba yònsò eyi. Tudi nè disànkà dyà kwikala mu bwobùmwe.

47 Mwanèètù mukùlumpè Bosworth ùvwa nè ciibidilu cyà kungambila, wàmba nè: “Mwanèètù Branham, udi mumanyè cidi bwobùmwe bùumvwija anyi?”

Mémè nè: “Ndi ngèèla meeji nànkù.”

48 Yèyè nè: “Mbantu bàbidì ànu mu bwàtù bùmwepelè.” Pa nànkù's ke bwalu mbwòbù abu, kàdi tudi nè bwobùmwe. Mukalenge ànwenzèlèku ngàsà.

49 Twasàkidilaayi bwà byònsò binùdì benzè. Nè nènteeke dimwè dyà ku òwò aa, disangisha edi, pa dibèji dyànyì dyà ménà, bu cimwè cyà ku bimanyishilu bikunze byà matùkù ànyì à mudimu wà bwambi, bwà dikwàcishangana dyènu dilenga dyà mu mudimu, bàna bèètù bàà balùme nè bàà bakàji balenga aba, nè bantu bònsò bàdi ànu nè mwakidilu mwìmpè menemene. Ndi ndyùmva ànu kwètù kumbèlu menemene, mu mùshindù wà nè ndi muyiishè dīyì dimpàte.

50 Mpindyewu, Mwanèètù Ned Iverson neikalè mwà kutungunuka nè masangisha paanyimà pàanyi, lwà ku—ku Colombie aku, kuntwaku nè Mwanèètù Bigbee. Mwanèètù Ned, udimù, dilòlòlò edi anyi? Ncyèna mumanyè ní . . . Èyowà, lwà mu ndekeelu mwàmwa. Presbytèrien, mùle tètè nè Nyumà Mwìmpè. Uh-huh.

51 Nè Docteur Lee Vayle nè mukàjèndè, balundà bàanyi bananga, bàà mushinga mukolè. Mwanèètù Vayle mmukwàte naanyi mudimu mu disangisha, mulundà wa mushinga mukolè. Ndi ngèèla meeji nè bantu aba bàkaadi baleejìbwe bònsò nè bikwàbò. Udi kaaba aka anyi, Mwanèètù Vayle? Udi mu nzùbu emu, dilòlòlò edi anyi? Paanyimà lwà mu ndekeelu mwàmwa. Mukalenge àkubènèshè. Mwanèètù wa bakàji Vayle, udi penyi? Mvwa ànu mukukùpe cyaanza cyaanàanà. Nzambi àkubènèshè, mwanèètù wa bakàji. Tudi nè disànkà dyàbùngì dyà kwikalakù naabò bònsò kaaba aka.

52 Nènkù nwènu bònsò nwànsambidilaayikù mpindyewu. Nènkù ndi ànu ntungunuka nè kuya ku diitabuujà, ngiitabuujà nè, pa dībà kanà dyònsò, tudi bafwànyine kumòna Dilwa dyà Mukalenge. Ncyèna ànu mumanyè nè mmunyi, ndībà kaayi, mmwaba kaayi, kàdi ndi muswè kwikala mudìlongòlòle

pààlwàYe apu. Nè mîngà misangu ndi mufwànyine kwela meeji nè mbifwànyine kwikala mùshindù ewu, nè mbifwànyine kwikala mùshindù mukwàbò. Kàdi, nànsha nànkù, ndi muswè kwikalapù pààlwàYe. Ndi muswè kuya Nendè. Mpindyewu, ke kiipàcilà kàanyi nkòkò aku. Nènku kí ng'ànu nè ndi muswè kuya to, ndi muswè balundà bàanyi bònsò, nè ndi muswè bwà beena lukunà bàanyi bònsò bàye, pààbò. Ndi muswè bwà bantu bònsò bàye.

<sup>53</sup> Mvwa mupetè cikèèna-kumòna cikesè aci, anyì, ncyèna muswè kucibiikila nè nditentemunyiibwa to. Kacya ncitukù mwanji kupeta cikèèna-kumòna cyà mùshindù awu to. Mvwa mwimàne kuntwaku munkaci mwà kucitàngila, mpingaja mèsù nditàngila, ànu àdi panshì aa. Bààbùngì bàà kunùdì bàkaadi bacibalè mu bikàndàkàndà nè bikwàbò. Balundà bàanyi, nwènù—nwènù kanwèna mwà kupanga kucimòna to. Kanùpangi kucimòna to.

<sup>54</sup> Mpindyewu, kùdi mwaba kampàndà muntwamu. Mvwamù ànu bu mûndi mwab'ewu emu, mwalùje mèsù muditàngile. Nkaadi mumònèmòne bikèèna-kumòna. Ndi mumanyè cidì cbikèèna-kumòna. Piikalàci cívwa cikèèna-kumòna, cívwa cyà citàmbe kwikala cyà pabwàci cínkààdiku mumòne. Nènku mème kumòna bantu, bàkaadi bafwè abu. Mème kubàmòna muntwamu. Bakùlàkàji bàvwa bansòngà. Nè bàvwa biimàne mwaba awu, bantu ànu bu mûndi emu, cibi kabàyi nè mpèkaatù to. Cívwa citàmbe nè bupwàngàne. Bilenga bitàmbe's! Kwèna—kwèna ànu mwà kutèèja cívwaci to.

<sup>55</sup> Nènku pangààkamanyà nè bìvwa bikèngela bwà mémè kwalukila, kùvwa ànu cintu cimwèpelè, nè, ndi muswè kwalukila, bwà kuteeta kuswishisha bantu. Cyònsò cyùdì wenza, kanùcipangidikù to. Kanùcipangidikù to. Kanùcipangidikù to. Kanwènakù mwà kwitaba bwà kucìpangila to. Bikwàbò byònsò, lekèlaayi bintu byònsò abi, kàdi dilongòlòlaayi bwà cyòci aci, nwamònu's, cyònsò cinùdì nwenza aci.

<sup>56</sup> Nènye mu madimi à bwambi mpindyewu, bu Mukalenge mwà kwanyisha, mu muvù wà mashìka ewu, pàndi mfùma ku ngendu eyi, pa nànkù ikàlaayi ànu nunsambidila. Bwalu, apa mbipeepèlè, ku musangu nè ku musangu udi umòna nyumà mubì ùbwela mu disangisha nè ùteeta kwenza cimvundù. Kàdi mu myaba ayi, mbampàkààmàngà nè baademons. Mbimpè ùmanyè cyùdì wamba aci. Ncyà bushùwà menemene. Bwalu, yòyi's ndémòns, nènku neyìkwelè kadyòmbò ànu mwaba awu. Kàdi, kaa, mùshindù mwìnè, musangu nànsha wùmwè. . . Ndi ncyàmba nè cyanza cyànyì mu Bible wanyì emu. Musangu nànsha wùmwè, kàdi's nudi bamanyè nè nudi mwà kudifwànyikijila nè mmisangu bùngì kaayi yìkaadibi byediibwe kadyòmbò pa buloba bujimà, Nzambi kàtu mupangè kumata mu cyalu to nè kusùsulula bilùlù bikùdika, nè kuDileeja, Nzambi, ànu mùshindù wùmwèwùmwè wùvwàYe mu cikondo cyà Eliyà

amu. Yèyè ùcidi ànu Nzambi. Èyowà. Kí mmusangu nànsha wùmwè to. Ke bwà cinyi mèmè. . .

<sup>57</sup> Bàmwè bàà kunùdì, bàmwè bambi, bàtu bàlwa kundòmba bwà mèmè kufika ku myaba yàbò. Ntu ngiindila too nè pangààdùmvwà mulombòdìibwe bwà kuya. Cyanààna mèmè mulwè, ndi ndwa ànu mu dìnà dyànyì nkààyanyì, mèmè mulwè mùshindù awu, ànu bwà kwikala mulundà webè. Kàdi pàndì ndyùmvwà mulombòdìibwe bwà kulwa, dībà adi ndi mwà kulwa mu Dìnà dyà Mukalenge Yesù. Pàndì ànu ngèèla cidya mpàtuka mu ndèkè, mwaba awu wùdì wùshààla wànyì. Amen. Ndi ngwàngata wònsò ku bukòokeshi, mu Dìnà dyà Yesù Kilistò. Dībà adi bidi bikèngela bwà wèwè kutwilangana Nendè pambèlu apu dībà adi, bwalu udi mùlòpò wà Nzambi dībà adi. Kàdi mpindyewu, pàdi èkèleeziyà kampàndà ùkutùma, anyì, mulundà kampàndà ùkubiikila, cintu kampàndà, uyààya ànu, mwikàle udicinkila cyàkàbidi. Ekèlekèle, dicinkila's wè! Ndi ngèèla meeji nè nudi bacyòke bwà kutèèleja aci nàнку.

<sup>58</sup> Mpindyewu tubuululàayi mu Bible mulenga wa kale awu. Nènku kumpàlà kwà twètù kwenza nàнку, túsambilàayi. Nwamònu's, tudi twakula, nè—nè bikwàbò, nènku mpindyewu tujalamijàayi meeji ètù ku nyùngulukilu Wendè mpindyewu bwà tusalam tukesè tùdi tìlondà etu.

<sup>59</sup> Taatù wetù wa mu Dyulu, tuvwà twela bantu twasàkidila bwà musàngelù wàbò, nè bwà meeji àbò manène, à kalolo kutùdì, nè mùshindù wutùdì tubàànyisha mene's. Nènku mpindyewu, Taatù, tudi baswè kuKusàkidila, kumutù kwà byònsò, bwalu ng'Wèwè, Mukalenge, udi mwenzè cyòci eci. Ng'Wèwè udi mutùbènèshe nè mutùsòmbèshe pàmwè mu myaba yà mu Dyulu mu Kilistò. Sàtaanà ùvwà mwà kwikala mutàcishe nè—nè munyangàkàje disangisha dyètù. Kàdi Wèwè udi ànu mutunangè bikolè be, mu mùshindù wà nè Udi ànu mutwanyishile bònsò bwà twètù kudìsanga pàmwè nè kubwela mu bwobùmwè banyùngùlùkile Dìyì. Nènku tudi tucyànyisha bikolè, Nzambi. Nànsha mwikàle nè dìyì dimpàte ndambù ku ditàmba kubàndisha dìyì, Mukalenge, mvwa ànu mupicile mu cikondo cilenga cyà dikèma, mwikàle ngùmvwà Nyumà Webè ùbènesha musùùkà wànyì. Dìyì, nciyì ànu njinga cintu kampàndà to, ànu ditùnkumuka bu misùlù, mu mùshindù wà nè byàkàkèngela ànu bwà mèmè kusòmbela panshi. Nzambi, ndi nè kusàkidila kwàbùngì bwà bwalu abu.

<sup>60</sup> Nè byènzekèku bwà Mwanèètù Parker, nè musùmbà wèndè wònsò ewu, nè mwaba ewu wùdì mutùbiikile, Mukalenge, swàkù bwà bàbèneshiibwè. Bàpèèshèku binunu byà misùùkà. Tèèlejà, pàdìbo bàsambidila babèèdi apu. Tèèlejààku masambila àbò, Mukalenge, nè òndopèku babèèdi. Nènku pàdìbo bàteeta kwenza cintu kampàndà mu Dìnà Dyèbè, citwèku mushinga, Mukalenge. Bàpèèshèku mamuma à Nyumà. Nènku. . . Nènku bàpèèshèku dijinga dinène dyà mwoyi wàbò, Mukalenge, dyà

misuùkà bu difutu dyàbò. Swàkù, mu Ditùkù adi patwìmanà kumpàlà Kwèbè, swàkù bwà misuùkà yifuminè myaba yònsò, bùùpukila muntu wa mushinga mukolè, wa difwàna dyà Nzambi nè bamukwàcishi bèndè nè: “Bu nè kùvwa mushààle mu budimi bwà bwambi to, Mwanèètù Parker, nùnkù katùvwa mwà kwikala mwab’ewu to.” Éyì Nzambi, tudi bamanyè nè ke dijinga dyà meeji matòoke dyà musadidi mulelèlà kanà yònsò wa Kìlistò ewu, bamanyè nè bàdi mwà kulombola bantu bapèlè, bajìmine kùdi Kìlistò udi usungila. Twasàkidila bwà byònsò abi.

<sup>61</sup> Nènku mpindyewu, Mukalenge, tudi tulòmba mpindyewu bwà Wèwè kubèneshakù muntu nè muntu. Nè bèneshàku masangisha àlwalwa aa, myaba yònsò. Ndàaku nè dìkù dyònsò. Ikàlàku naabò patùdi tuumuka, dilòòlò edi apa, bwà kuya ku mbànzá yetù mishìilèshìilàngàne. Ikàlàku neetù mu njila. Shààla ku yèndà. Lamàku mwena lukunà kule neetù, Mukalenge. Nè ndi ndòmba bwà Wènzèku bintu ebi.

<sup>62</sup> Mpindyewu tùpèeshèku dijinga dyà myoyi yetù, dilòmba dyònsò, dilòòlò edi. Nènku dyànyi mèmè didi, Mukalenge, bwà Wèwè kutùcibwilaku cyàkàbidì Dyàmpà dyà Mwoyi, dilòòlò edi. Kùdi muntu mwaba ewu udi kàyì musungìdiibwe to, musungile. Muntu yònsò udi ukèngela Nyumà Mwìmpè mu dibàtiiza, swàkù bwà Àlwe dilòòlò edi. Mubèèdi kanà yònsò; mwondòpèku. Muzengèle kanà yònsò; mupèeshèku disànka. Enzàku nànkù, Mukalenge. Bèneshàku Dìyì Dyèbè mpindyewu patùdi tuDibala apa, nè swàkù bwà MwenaDì àtùpèeshe dyumvwija. Tudi tulòmba mu Dìna dyà Yesù. Amen.

<sup>63</sup> Yone Munsantu, nshapità wa 1, 35 too nè ku 41, tudi baswè kubala Mèyi à mushinga mukolè aa.

*Nènku kàbidì ditùkù dyàkalondà paanyimà pàà Yesù mumanè kwimana, nè bàbidì bàà ku bayiidi bèndè; . . . (Mfwilaayikù luse.) . . . paanyimà pàà Yone mumanè kwimana, nè bàbidì bàà ku bayiidi bèndè;*

*Nè kutàngila Yesù pàvwàye wènda ùlwa apu, yèyè kwamba nè: Mònaayi Mwánà wa mùkòòkò wà Nzambi!*

*Nènku bayiidi bàbidì, bayiidi bàbidì abu kumuumwawò wàkula, ke kulondabò Yesù.*

*Pashiishe Yesù kukùdimuka, è kubàmòna bènda bàlonda, ke kubàmbilaYè nè: Nudi nukèba cinyi? Bàakamwambila nè: Laabi, (cidi ciswa kwamba nè, pàdici cyumvwija, Mulongeshi,) udi musòmbèle penyì?*

*Yèyè kubàmbila nè: Lwàyi numòne. Ke kulwabò nè kumòna mwaba wùvwàye ùsòmbela, nè kushàalabò nendè ditùkù adi: bwalu ciwva ciipacila pa dîbà dyà dikùmi.*

*Umwe wa ku bàbìdì bààkatèèleja Yesù anyi...  
Yone wàkula, nè kumulondaye awu, ùwwa ng'Andelè,  
mwanààbò nè Simonà Peetèlò.*

*Wàkanji kukapetangana nè mwanààbò sungasunga  
wa balùme Simonà, nè kumwambila nè: Tudi bapetè  
Maasiyà, cìdì cyùmvwija, pàdìci cyùmvwija nè, Kilistò  
awu.*

*Ke kulwayè nendè kùdì Yesù. Nènku pààkamutàngilà  
Yesù, wàkamba nè: Wèwè udi Simonà mwánà wa Yona:  
neùbùkidiibwe nè Keefà, cìdì cyùmvwija nè: Dibwe.*

<sup>64</sup> Mpindyewu Nzambì àsakidilèku mabènesha Èndè ku Dìyì edi. Mpindyewu, ndi muswè kupàtula, dilòlòlò edi, bu Mukalenge mwà kwanyisha, bwà ndambù, bwà—bwà mwàkù wùmwepelè, myàkù yìbìdì yìndì muswè kukwàta naayi mudimu. Myàkù yìbìdì yìndì muswè kukwàta naayi mudimi yìdì “mushààle mwena bwalu” nè “mutwishìibwe.”

<sup>65</sup> Mpindyewu, bu mutùdì bamanyè, nè twètù bònsò tudì bamanyè nè, tudì mpindyewu munkacì mwà kumòna dikwàcika dyà mashika, mu matùnga ònsò. Pangààkatwàdijà, kùvwà disànkà dyàbùngì mu masangisha. Bantu bàvwà mu masangisha à milòmbò, myaba yònsò. Mémè kudyùdiibwa, bibèjibeji kundyùla. Mukàjì kampàndà mmwendèshe màshinyì ntàntà wa kilòmèètà binunu binaayi nè nkàmà mwandamukùlù mu tàkisi, ànu bwà kufika ku masangisha à mu Canada. Kabàcyèna kàbìdì badyumvwè beena bwalu mùshindù awu to. Mbimwèke ànu bu nè nkulwè cibulà. Nè mbimwèke bu nè kakùcyèna dicyùka dyàbùngì to, kí ndyàbùngì menemene to, twamb'eku twamb'eku, kabiyì bu muvwàbì bìkèngela bwà kwikala to. Dicyùka dikesè menemene.

<sup>66</sup> Mpindyewu, pàmwè nè dicyuka dimwèpelè ditùdì naadi, kí mmasangisha à bufùkù bujimà awu to. Musangu kampàndà, mémè—mémè ngakashààla pa cibumbà cyà ku cyambilu musangu kampàndà munda mwà matùkù mwandamukùlù à muunya nè à bufùku, ncìyì ngùùmuka to, nteeta bwà kusambidila bantu bònsò. Kàdi ku ndekeelu, kùvwà bantu batwè ku binunu makùmi ànaayi nè byà mu njila bindile bwà kubàsambidila. Nwamònu anyi? Ncivwakù mwà kucyènta to. Kàdi bàvwà mwà kwangata musumbà kampàndà *elu* luseke, nè kubwela mu meetu; bàvwà mwà kwangata musumbà kampàndà *elu* luseke, bàya mu meetu; bambi bàsambidila bantu too nè ku dibàtiiza dyà Nyumà Mwìmpè. Kabàvwà ànu mwà kwikishaku to too nè pààkapetàbò Nyumà Mwìmpè.

<sup>67</sup> Numfwilaayikù luse. Ngàmì binunu makùmi ànaayi nè bìbìdì. Ngèèla meeji nè, nudi bafwànyine kutàngila mu cikàndàkàndà aci, kùvwà binunu makùmi àbìdì nè mwandamukùlù, kí mùvwàbì, bàcìvwà ànu munkacì mwà kwindila. Mu ntàntà wa kilòmèètà nè kilòmèètà mu

nyungulukilu wa Jonesbourg, kakuvwa mwaba nansha wumwe wuwaku mufwanyine kufucila to. Nnku bavwa baase ntenta, ne bikwabo byonso. Kabacyena kabidi babucyuka mushindu awu to. Nwamonu anyi? Tupyà twà ditàbuluja ke kujimatù eku.

<sup>68</sup> Bùdi bubàtonde mpindyewu, bùdi nè: “Lwàkù ànu ùshaale wa mu èkèleeziyà.” Anyi, cinènè cidi cibàtonde ncyà nè: “Kutwà mpàndà ku ndongamu wa bwambi wa ku tudyombà, anyi ndongamu kampàndà wa ku téléviziyó, nè kucivwija mushindu kampàndà wà bikàsà,” nè bwà—bwà dyàkalengèlè, mu bushùwà bwà bwalu, cyà bushùwà. Nzùbu minène, kwibaka bilongelu binène, nè bikwàbò, mushindu awu. Mbimwèke ànu bu nè aci ke cidi bwalu bùdi—bùdi bubàtonde mpindyewu. Benze bu bajimije mmwènu wa disambila adi nè dyanzejiibwa, bu mwàkadìbo naaci kale. Kùdi cintu kampàndà cidi cyenzeke. Ndi muswè ànu kumanya nè civwa ncinyi. Kàdi mpindyewu kabèèna bàmwèka bu nè bìdi bibàtonda bwà . . .

<sup>69</sup> Nudi mwà kukumbula èkèleeziyà ewu, anyi kubiikila bantu bwà kulwabò ku cyoshelu, nè bivwa nè bavwa ànu mwà kunyeemena ku cyoshelu. Nnku nkaadikù mumòne dibà divwà mèmè munkaci mwà kuyiisha, kumpalà mene kwà mèmè kujikija diyiisha dyanyi, cyoshelu nè kuulu nè kwìnshì kwà tujila kuvwa mwà kwikala nè bantu bèle milongo. Nkaadikù mumòne cikondo civwà Nyumà Mwimpè mwà kunyunguluka mu batèeleji amu, nè—nè kudyanjila kwamba nè kulondela muntu kampàndà cintu kampàndà, nè bantu bavwa mwà kukàcila nè bùuminyina ànu mu nkwasà yabò.

Kùdi cintu cipampalàmùke mwaba kampàndà.

<sup>70</sup> Ncidi ànu ngenza cintu cimwècimwè aci. Ànu Èvànjeeliyò umwèumwè awu. Kacya ncitukù mwanji kushintulula to nansha kakesè kacya ànu ngàbanga. Ngàkabanga ànu nè Dìyi dyà Nzambi dikezùke, mu dyòdi nkàayaadi, nè mèmè kushàala ànu naaDi, kubangila ànu piinè apu. Ndi paanyimà pàà cyambilu apa kùkaadi bidimu makùmi àsàtù nè bibidi, nè kacya ncituku mwànji kuumusha cintu nansha cimwè anyi mushintulule cintu nansha cimwè to; ndi ncyamba ànu mushindu wungàakabanga awu. Ncyèna mwà kucyùmusha to. N’Dìyi dyà Nzambi. Nnku—nènku mèmè muDyambè ànu mùdiDi dyambiibwe *kaaba aka* emu, musangu wàlondà ndi nè cyà kwamba cintu cimwècimwè aci, bwalu’s *ke* mushindu wùdiDi difùnda *kaaba aka*. Nwamonu anyi? Pa nànkù, ncyèna ànu mwà kwenza cingà cintu pa Dyòdi to. Nè Nyumà Mwimpè ùcidi ànu wènza cintu cimwècimwè aci.

<sup>71</sup> Pa nànkù, kàdi bìdi bimwèka nè kakùcyèna kabidi menemene bùdi bùbàtonda to. Mpindyewu ndi. . .ndikonka nè mbwà cinyi, mbwà cinyi kakùcyèna kabidi bwalu bùbàtonda mwàkadìbi kwònsò eku? Mbwalu, ngèèla meeji nè piikalàku kakùcìyi bwalu bùtàmba kubàtonda mwàkadìbi kwònsò eku, kí mbatwishiibwe menemene mwàkadìbo kwònsò eku to.

Bikèngela wikalè mutwishìibwe kumpàlà kwà wêwè kushààla mwena bwalu.

<sup>72</sup> Kakwèna bùdi bùbàtonda to, udi wangata díbà mpindyewu, pamutù pàà kwenza butangadiki kàdi kuteeta kwenza cintu kampàndà, muntu yònsò mmuswè cilongelu cinène menemene, anyì cintu kampàndà cyà cinène menemene cidìye mwà kulongesha, nè—nè kwenza nè bambi bìikalè nè ngenzèlù mîmpè yà mu cyambilu nè bikwàbò.

<sup>73</sup> Nudi bamanyè cîndì mèmè ngiitabuuja anyì? Ndi ngiitabuuja nè bantu kî mbatwishìibwe nè Yesù ùlwalwa kataàataka to. Ncyèna ngiitabuuja nè mbatwishìibwe nè Yèyè ùlwalwa mu eci cikondo to. Nènku ndi ngèèla meeji nè ke bwà cinyì kakwèna bùdi bùbàtonda to, bwalu kî mbatwishìibwe mu kaabujimà to. Cyà bushùwà. Kî mbatwishìibwe nè Yèyè ùdi naabò to. Bu bìikala nànkù, bàvwa mwà kwalukila ku Dìyì. Ncyà bushùwà. Kàdi mpindyewu bantu bààbùngì mbafwànyìne kucyùmvwà bibì.

<sup>74</sup> Dinanga, dinanga dùtu—dùtu dikazamuna. Udi nè cyà kukàzamuna bantu, wêwè mubànangè. Bu mwanèèbè mutekète wa bakàjì musòmbe mu njila mwàmwa, bu mungàmbi mu dindà emu, munkaci mwà kulàmba nshimà yà bitoci; wêwè mumunangè cyà bushùwà, udi mufwànyìne kumuumusha mu njila amu.

<sup>75</sup> Ambàbi tũng bu mukàjèèbè mwà kwamba nè... John *Kampàndà*, dîna dyèbè nànsha diikàle cinyì, udi mumanyè's, wêwè kumulekela ùpàtuka nè mulùme mukwàbò, bwalu wêwè wakamba nè: “Mwoyi wèndè mukesè awu wùbèneshiibwè's wè! Yèyè's mmuswè kucyènza. Nè mèmè ndi ànu mumunangè bikolè be, nèmulekèlè wènza nànkù's.” Wêwè kàdi's ke kametamadimbu kàà mulùme's. Bikèngela mukàjì awu àkulekèlè, nè àkapetè muntu mukwàbò udi mumunangè, wìkala mwà kumukùba. Ncìvwa nè meeji à kucyàmba mùshindù awu to, bwalu kwèna mwà kwenza nànkù to.

<sup>76</sup> Kàdi kùndì nteeta bwà kufika nku eci: ncyà nè, bu Nzambì mwà kwambila Evà nè: “Evà mukesè mukwàte nè byà luse ewu. Udi mumanyè's, wêwè ewu's udi mwan'Àanyì. Ndi—Ndi—Ndi... Kùvwa nè meeji à kwenza nànkù to”? Mu bushùwà bwà bwalu, mukàjì awu kàvwa nè meeji à kucyènza to. Ncyà bushùwà nè, kàvwa naawù to. Kàdi wàkacyènza ànu's. Nènku's tudi bamanyè nè yèyè wàkacyènza. Tucìdi ànu tumòna bipeta byàci. Kàdi, nuði numòna's, Yèyè—Yèyè ùvwa mumunangè, nè byàkakèngela bwà Yèyè—Yèyè kushààla mukwàte ku Dìyì Dyèndè bwà bwalu bwèndè.

<sup>77</sup> Nè bìdi bikèngela bwà Nzambì àshaalè mukwàte ku Dìyì Dyèndè kutùdì, pa nànkù tudi nè cyà kutùmikila Dìyì Dyèndè. Nè patùdì tutùmikila Dìyì Dyèndè, nè pashiishe tuMumòna ùshindika cyàkambàYe nè Neènzè aci, díbà adi tudi

batwishiibwe, mu bulelèlè nè, Diyì ndilelèlè. Mpindyewu, patùdi tujandula, tudi tulwa nè. . .

<sup>78</sup> Ànu àbìdì àdì panshì aa, mutangadiki munène ewu ùvwa wàkula nè Mùzùlùmaanyì kampàndà, nuvwa bacibalè mu cibèjibèji, ànu mùmvwà mèmè pàanyi mucibalè amu. Mùzùlùmanyì ewu wàkeela mutangadiki awu kadyòmbò, nè: “Yesù Kilistò ùvwa ànu mmuntu uvwabò bàkuukwila; bwà nè bantu bàvwa bènda bàlonda muntu.” Ùvwa wítabuuja Nzambi umwèumwè uvwa mutangadiki awu mwitabùùje, kàdi wàkamba nè: “Yesù kî m’Mwân’Èndè to. Cidi ànu ndikuukwila dikwàtakaja kùdi bantu’s.” Nènku mutangadik-. . . Yèyè kwela mutangadiki awu kadyòmbò, kwamba nè: “Bible ùdi—ùdi wàmba nè byenzedi byàkenzàYe abi, Yèyè Kilistò, bayiidi Bèndè nebènzè byà mwomwè.” Yèyè nè: “Mpindyewu, nèmbwèjè babèèdì makùmi àsàtù, nènku wèwè kubweja babèèdì makùmi àsàtù, nè nèngòndopè bùngi bònsò bwàbò buwòndopa wèwè abu.” Nwamònu anyi? Ke mutangidiki kuya lubilu. Kuya lwàkaya batòòke.

<sup>79</sup> Nènku bu ngiikala mutangadiki awu, ngèèla meeji, bu nè ncìvwa nè diitabuuja dikùmbàne bwà kucyènza to, Ncìvwakù mufwànyine kulekela mwena bupidyà awu mwimàne mwaba awu to. Mvwa mufwànyine kwamba nè: “Ndi mumanyè muntu kampàndà mu bipaapu byètù ùdi nè diitabuuja dyà kucyènza.”

<sup>80</sup> Bwà cinyi? Bikèngela wǎnji kwikala mutwishiibwe, dyàmbedi nè, n’Nzambi, dîbà adì udi umanya mwaba wùdi mwimànyine. Mbulelèlè. Mutwishiibwe, dyàmbedi, dîbà adì udi upeta bwèbè bìdi bùkutonda. Nànsha mùdi bantu bàmba nè Nzambi ùdi naabò, kàdi bàdi. . . Kî mbònsò to. . . Màmù ùvwa nè ciibidilu cyà kwamba nè: “Byenzedi bìdi byàkula bikolè kutàmba mèyi.” Cyà bushùwà, bìdi byàkula. Udi nè cyà kucyènza, kuciitabuuja, kwikala mutwishiibwe, nènku dîbà adì neùshaalè mwena bwalu.

<sup>81</sup> Yesù wàkamba nè: “Wèwè muNnangè, diisha mikòòkò Yànyi.” Mpindyewu, ke mwaba awu wùndi ngèèla meeji nè tudi bapangile bikolè, ngwà kudiisha mikòòkò Yèndè. “Wèwè muNnangè, diisha mikòòkò Yànyi.” Leelù ewu, bikaadi ànu bu nè: “Kòsa myòsà yà mikòòkò Yànyi.” Nda naayi mu mwaba kampàndà nè wàngatè byònsò bìdiyi naabi, nè ùbàfikishè ku dyeyeka nzùbu yàbò, nè mfrangà yàbò yà difutu dyà bununu ayi, nè bikwàbò byònsò. Nwènu bàdi bàmba bwà dikòsa dyà myòsà’s! Yesù kacya kàtukù mwámbe nànkù to.

Mwanèètù Parker mmwámbe, mu dindà emu nè: “Nzambi mmunangè bantu Bèndè.”

<sup>82</sup> Ùtu munangè mikòòkò Yèndè. Wàkamba nè: “Yidiishaayi.” Nè mikòòkò yidi nè cyà kwikala nè Cyàkudyà cyà mikòòkò. Nè Yèyè kacya kàtukù mwámbe nè: “Longesha mikòòkò Yànyi to.”

Yèyè wàkamba nè: “Yidiishaayi,” kí nkuyilongesha tùlaasà to. “Yidiishaayi. Yipèeshaayi Cyàkudya cyà mikòòkò.”

<sup>83</sup> Cyàkudya cyà mikòòkò ncinyi? Dyàmpà dyà Mwoyi. Yesù ke Dyàmpà dyà Mwoyi, Èvànjeeliyò, Bulelèlà. Muiishe kùyi udyà cibàngà to. Dìbà adi udi umanya nè pàdìbi bikèngela bwà wèwè kulumbulula ku Ditùkù dyà Cilumbulwidi bwà musùùkà wàbò, bu mwambi wa Èvànjeeliyò udi mwà kwimana nè kwamba nè: “Ke cyàkafundiibwà mu Dìyi ncyòci aci.” “Yidiishe Bulelèlà. Dìisha mikòòkò Yanyi.”

<sup>84</sup> Pàakatamba bwalu kutonda Yone, mu mùshindù wà nè ùvwa mumanyè nè Maasiyà ùvwa nè cyà kulwa mu cikondo cyèndè. Yone Mubàtiji ùvwa mucimanyè, pa nàнку ùvwa mumanyè nè Maasiyà ùvwa mwà kulwa mu cikondo cìvwàye nè mwoyi aci. Kàdi pàakapàtukàye mu cipèèlà, kàakatwàdijakù bilongelu to. Yèyè kàakabangakù bilongelu bitùmbùke to. Kàakabangakù malongolodi to. Bwà cinyi? Ùvwa mutwishiiibwe nè Maasiyà ùvwa mwà kulwa mu cikondo cyèndè. Mamuma èndè, Mukenji wèndè, cyenzi cyèndè, byàkacifidila bujaadiki.

<sup>85</sup> Nènku tudi twitabuuja nè Yèyè ùdi Ùlwa mu cikondo eci. Bwà cinyi tudi baswè kukungwija cintu cinène? Mbwà cinyi butùdi mwà kwenza nàнку, kwela mìllyò yà ndola mu diibaka dyà bilongelu nè nzùbu, kàdi pashiishe kwamba nè Yesù ùlwalwa? Mòna’s, bantu bònso’s mbamanyè bimpè kutàmba aci. Mbamanyè nè nudi nwakula bwà cintu kampàndà cinùdi kanùyi nwtabuuja to. Twenzàayi citùdi tuyiisha. Cyà bushùwà. Mpindyewu tudi nè cyà kwenza nàнку.

<sup>86</sup> Yone ùvwa mutwishiiibwe ànu menemene. Pàakalediibwàye, ùvwa mumanyè nè yèyè wàkalediibwa ku dilediibwa dyà pabwàdi.

<sup>87</sup> Tudi bònso bamanyè mwàkamònà Zekàayi Mwanjèlò. Nè aci cìvwa nè cyà kwikala diteeta dikolè bwà babàka banunu abu. Zekàayi ùvwa mulùme mukùlumpè, nè Èlizàbèètà ùvwa mukàji mukùlumpè, kàdi bàvwa biitàbùùje nè—nè Nzambi neàbàpèeshe mwànà wa mu dibòkò dīngà ditùkù. Yèyè’s ùvwa nkumba. Nè tudi bamanyè pàakalediibwà Yone, dilediibwa dyà pabwàdi, nè bamanyè nè yèyè ùvwa mwà kwikala musadidi wa Nzambi, bivwa nè cyà kwikala bikolèle babàka bakulàkàji abu. Bwalu bàvwa bamanyè, bilondèshìle cikondo cyà mwoyi nè, kabàvwakù bafwànyine kwikala nè mwoyi bwà kumòna mwànà wa balùme awu ùbwela mu mudimu wèndè wà bwambi to.

<sup>88</sup> Nè tatwèndè wa Yone ùvwa mwakwidi. Kàdi yèyè, mwikale nè dibiiikila adi, pamutù pàà kupwekayè ku sèminèrè kwàkapàtukila tatwèndè aku, yèyè kàvwa mwà kuyakù to. Kàvwa mwà kudidīngà kuteeta to. Kàvwa ànu mwà kusopakana naaci to. Bwalu, wàkamòna nè, mu Mifundu, yèyè ùvwa nè cyà kwikala: “dìyi dyà ewu udi wela lubilà mu cipèèlà.” Wàkamòna nè ùvwa nè cyà kwikala: “Mùsànjeelà uvwa mwà

kuya kumpalà kwà Maasiyà awu.” Nè yêyè ùdi nè cyà kwikala mutwishiibwe bwà cyôci aci. Kàdi’s wàkindila mu cipèèlà too nè pàakatwishiibwàye, nè pashiishe wàkashààla mwena bwalu. Úvwa mutwishiibwe. Úvwa muswè bwà—úvwa muswè kushààla. Úvwa mutwishiibwe ànu menemene bwà cyôci aci, cyà nè úvwa mwà kumòna Yesù, mu mùshindù wà nè wàkamba nùnkù: “Mònaayi, Yêyè mmwimàne munkaci mwènù mpindyewu. Kùdi Kampàndà munkaci mwènù amu, Unùdi kanùyì bamanyè to.” Kaa, mèmè ntu munangè aci’s!

<sup>89</sup> Kùdi Kampàndà munkaci mwètù, dilòòlò edi, kàdi ndi nè disànkà dyà mutùdi baMumanyè. Nè ndi ngùtabuuja nè Yêyè ke Udi ufla bujaadiki. Nyumà Mwimpè munène awu ùdi munkaci mwà kufila bujaadiki nè Yesù ùlwalwa kataàtaka, bwalu mbilondèshile Dìyì, nè bimanyinu byònsò bìdi munkaci mwà kuula. Tudi ku cikondo cyà nshiikidilu.

<sup>90</sup> Kàvwa muswè kushààla kàdi pashiishe kwenza bilèma to, ke kushààlayè mu cipèèlà too nè pàakatwishiibwàye nè úvwa mwà kumanya civwà Maasiyà. Ke Nzambì kumwambila nè ncimanyinu cyà mùshindù kaayi cyà kutàbaleela, pààmònàye Maasiyà. Nènku pàakaMumònàye, nè kumòna cimanyinu civwà nè cyà kuMulonda, wàkatwishiibwa nè úvwa n’Yêyè. Yêyè nè: “Ndi mfla bujaadiki nè n’Yêyè.” Bwalu, Nzambì, Úvwa mumwambile awu, nè mudyanjile kumwambidila ku mupròfetà, bidimu nkàmà mwandamutekète nè dikùmi nè bìbìdi kumpalà kwà kulediibwayè awu, “Yêyè úvwa dìyì dyà ewu uvwa wela lubilà mu cipèèlà nè: ‘Longòlòlaayi njila wa Mukalenge, nè lulàmijaayi kajila Kèndè.’” Nènku Nzambì uvwa mudyanjile kumulongolola awu, nè mudyanjile kumulongolola ku mudimu awu, wàkindila Nzambì awu too nè pàakuumvwàye cyà kùdi Nzambì awu. Amen. Pàakamwambilà Nzambì awu civwà nè cyà kwenzeka, yêyè wàkatwishiibwa. Pàakamònàye cimanyinu aci, wàkamba nè: “S’ki Yêyè awu.” Amen.

<sup>91</sup> Bu twètù ànu mwà kwikala nè meeji matòòke à mùshindù awu’s! Bu twètù mwà kwindila ku cyoshelu, katùyì ànu tupeta njiya kampàndà mikesè nè tutùpika tuya lubilu, kàdi kushààla mwaba awu. Cidi cyènzekà nànsha ciikàle cinyì, shààla mwaba awu too nè paùdi utwishiibwa ànu menemene ku bukolè bwà dibìikà Dyèndè dyà ku lufù, nè Nyumà Mwimpè mmukupyè nè mukukwàte, nè wèwè udi cifùkiibwà cipyaciya mu Kilistò. Shààla mwaba awu too nè paùdi ufwà nè ubiika cyàkàbìdi ku lufù, dìbà adi kwàkuya ku màyi mwena lubombo to. Wèwè neuye kuntwaku, kàdi mumanyè nè Yêyè—Yêyè wàkakufwila, nè wèwè wakafwà Nèndè. Mpindyewu uyààya kuntwaku, bwà kubiishiibwa Nèndè cyàkàbìdi; kuleeja bàà pa buloba nè udi witabuuja nè Yêyè wàkafwà nè wàkabiika ku lufù, nè udi mufwè Nèndè, nè mumanè kubiishiibwa ku lufù cyàkàbìdi. Nènku mpindyewu neüsómbe mu myaba yà mu Dyulu, munkaci mwà kudyà Cyàkudyà cyà mikòòko. Cyà bushùwà.

92 Andèlè, munène utùdi twamba ewu, mwanààbò nè Simonà, wàkashààla bufùkù bujimà, too nè pààkatwishiiibwàye. Pàvwàye wènda ùpwèka ku mwelelu wà musùlù apu, Yone, mupròfetà munène ewu kutùngunukayè nè kwamba nè: “Kùdi Umwe! Cíkondo cikaadi pabwípì. Nwènu bònso nkòngò yà nyòka mu mashinda, kanwèdikù meeji bwà kwamba nè: ‘Ndi wa mu *cikampàndà*, nè ndi wa mu *cikansanga* to. Tudi nè Abraham bu taatù wetù.’ Ndi nnwàmbila nè, Nzambì ùdi nè bukòlè bwà kujuudila Abraham bânà ku mabwe aa.” Kaa, yèyè’s ùvwa ànu munkaci mwà kutèèka kuntwaku, cisuuyi ku muji wà mucì.

93 Nwamònu’s, Yone ùvwa muntu wa mu cipèèlà. Tàngilàayi byèndè bivwàye wàkula: bisuuyi, micì, nyòka. Nwamònu anyi? Ke bivwàye mwibìdilàngàne naabi abi’s, mu cipèèlà amu. Ke kwambayè nè: “Cisuuyi nciètèkiiibwe ku muji wà mucì, nè mucì wónsò wùdi kawùyi wùkwàma mamuma mimpè awu newùpudiibwè nè kwoshiibwawù.” Wènda ùtuuta cisuuyi ku mucì aku; ùkòsa mitù yà nyòka, nè bikwàbò byònsò. Ùvwa muntu wa mu cipèèlà.

94 Kabyèna bikèmesha to pààkamba Yesù nè: “Nuvwa bapàtuke bwà kukamòna cinyi?” *Disànkà Dipwìbwe mwoyi* adi, bu mùmvwà muyiishepù. PààkayàYe dyàmwàmwà dyà kakùna, bayiidi bàà Yone kwambabò nè: “Cinuvwa bayè kamòna ncinyi, muntu mulwàte bilàmbà bilenga anyi?” Yèyè nè: “Bàà mùshindù awu ke bàtùbo bàbiiikila nè: ‘Docteur, taatù wa bunsantu.’ Nè bàtu bàlwàta bilàmbà binefùke. Bàtu bàtwa bânà mishiku, nè bàswika mabàkà à—à bansòngà, nè bàjiika banunu. Ùdi ùkwàta mudimu nè keelè kakesè.” Ncinyi cidi muntu bu nàнку mufwànyine kumanya pa bìdi bitàngila Mwelè wà mvità wà dikwàta nè manza àbìdi kwàka ku mwalu wà mvità? “Nuvwa bayè kamòna wa nàнку awu anyi?”

95 Bàmwè kwambabò: “Nàнку nuvwa bayè kamòna dilèngè dinyùkusha eku nè eku kùdi lupeepèlè kanà lwònsò anyi, anyi kasùmbu kakesè kanà kònsò kàdi mwà kulwa aku, kukushintulula kukuumusha ku *cikampàndà* kuya ku *cikansanga*, nè ku *cikampàndà* kuya ku *cikansanga* anyi?” Kì n’Yone to. Yèyè ùvwa mutwishiiibwe. Yèyè—yèyè ùvwa mumanyè mwaba wùvwàye mwimànyine. Ùvwa mumanyè kaaba kèndè. Yone kàvwa ùnyùkushiiibwa eku nè eku to. To, to.

96 Yèyè nè: “Nuvwa bayè kamòna cinyi dìbà adi’s, mupròfetà anyi?” Yèyè nè: “Kàdi Mèmè ndi nnwàmbila nè, munène mutàmbe nè mupròfetà. Yèyè’s mmutàmbe nè mupròfetà.”

97 Pa nàнку Yone ùvwa mutwishiiibwe, ke kubangayè kuyiisha. Nèнку Andèlè ùvwa ùya mu masangisha. Nèнку pààkapiçilà Yesù mwaba awu, ke Andèlè nè muyiidi mukwàbò ùvwa mwaba awu, nè Yone kubàfunkwinayè, nè kwamba nè: “Mònaayi Mwàna wa mùkòòkò wà Nzambì udi umusha mpèkaatù wa bàà pa buloba.” Ke kuMulondabò.

98 Ndi muswè aci. Mvw'a kujinga ngikalakù nè dikàndà adi mu diyisha dyanyi's. Pàndi ngàmba nè: "Mònaayi Mwànà wa mùkòkòkò wà Nzambì udi umusha mpèkaatù wa bàà pa buloba," nè muntu yònsò mmufwànyine kuMulonda. Ekèlekèle! Lekèlè . . .

"Ndi mMusangana penyì, Mwanèètù Branham?" Ndi mwà kukuleeja.

99 Ànu àbìdì àdì paanshì aa, mvwa nsanganyibwa mu disangisha dyà Beena Kantu-ku-byanza. Nènku mvwa nyiisha lwà ku Côte Ouest kwàka. Ke muntu kampàndà kulwayè tamàkàtamàkà nè kùndi, kwamba nè: "Ambà tǔng, wèwè kwèna muiyishi anyì?"

Mèmè nè: "Èyowà's, mukalenge."

Yèyè nè: "Cyùdì wenza nè beena kantu-ku-byanza aba ncinyì?"

Mèmè nè: "Mèmè's ndi mwena kantu-ku-byanza."

Ke yèyè nè: "Udi mu mushinga wà mùshindù kaayi's?"

Mèmè nè: "Mushinga wà Ditwishiibwa."

Yèyè nè: "Sonas wa mùshindù kaayi awu's?"

Mèmè nè: "Ditwishiibwa."

Yèyè nè: "Ke dyà mùshindù kaayi awu's?"

100 Mèmè nè: "Ditwishiibwa dibènèshìibwe, Yesù ngwanyì mèmè." Mèmè nè: "Wèwè nè meeji à kubwela, ndi muswè kuyiikilangana neebè pa bwalu abu."

101 Mulundà wanyì kampàndà, Mukalenge Snyder, nsongààlùmè wa mushinga mukolè, kulwayè kwànyì kumbèlu. Nènku mvwa mumumanyè pàncivwà mwànà mutekète, nè tuvwa tuyà mu kàlaasà pàmwè. Yèyè nè: "Billy, ndi muswè kukusumbishakù mukàndà kampàndà wà sònas."

102 Èè, musangu kampàndà bàakankùtakaja, pa bwalu bwà sonas abu, kàdi ncyàkamwangatakù kàbìdì to. Ke yèyè kwamba . . . Mèmè kwamba nè: "Wilmer, ncyà bushùwà nè ndi—ndi muswè . . . bu wèwè, kàdi," mèmè nè, "nkàadi—nkàadi nè ditwishiibwa."

Yèyè nè: "Kaa, udi nendè anyì?"

103 Mukàjàànyì kungooshayè dīsù byenze bu nè mvwa mwena lubombo. Yèyè ùvwa mumanyè nè ncivwa nè mukàndà wà sònas nànsa wùmwe to, kàdi mèmè kwamba nè: "ditwishiibwa." Nwamònu anyì?

104 Yèyè nè: "Kaa, mfwilèku luse, Billy." Yèyè nè: "Ngwà mu kùmpànyì kaayi?"

Mèmè nè: "Mwoyi wà Cyendèlèlèlè."

Yèyè nè: "Ncyèna ngèèla meeji nè nkàadikù muumvwè bààkula bwà kùmpànyì awu to."

Mémè nè: “Bivwa bikèngela wèwè kumanya’s.” Kaa, ndi mutwishiiibwe nè mbulelèlà. Ncyà bushùwà.

<sup>105</sup> Pa nàнку, Yone wàkayiisha nè kwambayè nè: “S’ki Yéyè awu, Mwànà wa mùkòòkò wà Nzambi udi umusha mpèkaatù wa bàà pa buloba awu.”

<sup>106</sup> Pàndi mMumòna wèndakana mu batèèleji, ùpulumuna ngènzàmpèkààtù kampàndà, anyì mubèèdì kampàndà, nè wàkula naabù, nè ùmanya nè Aci n’Nzambi mwena diinà, nè muntu kanà yònsò ewu, udi mufwànyine kumanyakù cintu kampàndà, mmufwànyine kumanya nè mémè ncyèna mufwànyine kwenza aci to. Ndi muswè kwamba nè: “Mònaayi Mwànà wa mùkòòkò wà Nzambi udi umusha mpèkaatù wa bàà pa buloba.”

<sup>107</sup> Mémè ntu munangè bwà bantu, kwamba nè: “Ndi nciiitabuuja. Ndi mpindyewu nyingalala bwà mpèkaatù yànyì. Ndi ngiiitabuuja Yesù Kilstò.” Kaa, mémè’s ntu muswè kubàmòna bènza nàнку.

<sup>108</sup> Kàdi’s bayiidi aba bààkatwà Yesù paanyimà ànu dyàkàmwè. Ke kukènzakanaYè. KubàsanganaYè. Ke kwambaYè nè: “Nudi nukèba cinyi?”

<sup>109</sup> Kwambabò nè: “Laabi, (cyùmvwijiiibwa nè, Mulongeshi,) Udi musòmbèle penyì?”

<sup>110</sup> Yéyè nè: “Lwâyi nùmonè.” Mpindyewu adi’s ndibiikila dilenga dyà dikèma. “Lwâ ùmonè.” Mémè ntu munangè aci.

<sup>111</sup> Ke cyàkambilà Filipò Natànàèlà aci, pààkambà Natànàèlà nè: “Nkufwànyinekù kupàtuka cintu cìmpè mu Nazalèètà anyi?” Yéyè nè: “Lwàku ùmonè.”

<sup>112</sup> Nàнку díbà adi, lwàkù, ùdimwènènè. Kùshàadi musòmbè kumbèlu bwà kudyula to. Lwàkù, ùdimwènènè. Nwamònu anyi? “Lwàkù, ùdimwènènè wèwè nkààyeebè.”

<sup>113</sup> Mpindyewu, bàvwa bàmba nè kùvwa nku ibaamulòòlò, ki Andèlè kushààlayè bufukù bujimà. Kaa! Ke mùshindù mwìmpè ngwòwò awu. Wàkashààla too nè pààkatwishiiibwayè. Cìvwa Muntu awu mumwambile dilòòlò adi, cyàkamwambilàYè aci, anyì cyàkenzàYè aci, kùvwa cintu kampàndà cyàkatwishishà Andèlè mu kaabujimà nè Yéyè ùvwa Maasiyà awu.

<sup>114</sup> Ditùkù dyàkalondà kumpàlà kwà díbà kupàtuka menemene, ngèèla meeji nè, wàkapyà cinkutu cyèndè nè cifulu, nè kupweka nè njila, bwalu Peetèlò ùvwa nè cyà kwikala munkaci mwà kulòba ku musùlu aku. Ke yéyè nè: “Lwàkù, ùmonè Utùdi bapetè. M’Maasiyà awu.” Ùvwa mutwishiiibwe. Pààkatwishiiibwayè ànu menemene nè ùvwa m’Maasiyà awu, bwalu bwà mwanààbò wa balùme bwàkamutonda.

<sup>115</sup> Ke lutàtù lùdiku, dilòòlò edi ndwòlò alu. Bantu kí mbatwishiiibwe bwà Mukenji to. Bantu kí mbatwishiiibwe bwà Nyumà Mwìmpè to. Wèwè mutwishiiibwe cyà bushùwà, díbà adi

udi ushààla mwena bwalu. Newènzè cyònsò cyùdi mwà kwenza aci, bwà kwenza cyònsò cidì cikèngelà wèwè kwenza naaci aci. Wèwè udi wamba nè: “Èè, Mwanèètù Branham, mèmè ncyèna muyiishi to.” Èè, udi mwà kwenza cintu kampàndà, wèwè pèèbè.

<sup>116</sup> Ndi mvùluka musangu kampàndà mvwa nè disangisha. Kwàkadi cidimè kampàndà wàkasungidiibwa nè mûle tètè nè Nyumà Mwîmpè. Nè yèyè kàvwa nè cintu nànsha cimwè to ànu dilabula dyèndè, nè màshinyi à cisemuna. Kàdi wàkakòkamù bantu bapite búngì ku disangisha, wàkapeta bakwàbò makùmi àsàtù bújiibwe nè Nyumà Mwîmpè, kumpàlà kwà aci...?..Bwà cinyi? Ûvwa mutwishiibwe. Nènku pàakatwishiibwàye, wàkashààla mwena bwalu. Mwàna mukèsè wa bakàji wàkwondopiibwa. Tuvwa nè babèèdi dilòòlò dyònsò, màshinyi à cisemuna mûle tètè naabò, ùbàtwàla buumukila myaba yònsò. Makùmi àsàtù kupetabò Nyumà Mwîmpè. Nwamònu anyi? Ûvwa mutwishiibwe nè Cívwa cilelèlà, ke kudyumvwa bwà mukwàbò muntu búmutonda. Nènku tudi... Twètù batwishiibwe nè Yesù ùlwalwa kàtàatakà, bwalu bwà bajimine bèètù nebùtùtondè. Netwènzè cyònsò citùdiku pèètù mwà kwenza aci bwà kumwangelaja Èvànjeeliyò.

<sup>117</sup> Yakòbò wàkashààla bufùkù bujimà, bufùkù kampàndà, munkaci mwà kulwangana mvità yà bibùlà. Mwàna wa mfùmù mulwanganyi wa mvità yà bibùlà awu, wàkalwangana mvità yà bibùlà bufùkù bujimà. S’ùvwa wènda ùsokoma Esawù *eku* nè *kwàka*. Ûvwa nendè nè bwòwà bwà lufù’s. Nènku kuumvwayè nè Esawù ùvwa ùlwa. Kusabwishayè mukàjèndè dyàmwàmwa dyà kasùlù aku. Kuyayè ku luseke lukwàbò è kutwàye binù panshi. Nudi bamanyè’s, Nzambi wàkatùùluka nè kutwà Yakòbò byanza, nè kulwanganabò mvità yà bibùlà bufùkù bujimà. Pa nànkù yèyè—yèyè kàvwa mutwishiibwe ànu menemene to, bangabanga. Kàdi pàakambà Nzambi kujikija nèndè, ùvwa mutwishiibwe. Èyowà. Wàkashààla mukwàte too nè pàakatwishiibwàye nè ùvwa n’Nzambi.

<sup>118</sup> Mwanèètù, díbà adi yèyè kàkumvwa Esawù bwòwà to. Wàkasabuka musùlù, nè ùkaavwa mutekète nè ùtèbuka. Byàkamwèka nè ke cikondo citàmbe bubì cívwaye mwà kusanganyiibwamù. Yèyè—yèyè ùvwa—yèyè ùvwa mutàmbe kuzengela kupita nè mwàkadiye kwònsò eku. Ûvwa mucibùkile panshi nè bikwàbò byònsò. Kàdi Esawù wàkamwambila nè: “Udikù mwà kundekela ntumè cilwilu bwà kukukwàcisha anyi?”

<sup>119</sup> Yèyè nè: “Ncyèna mene nkèngela dikwàcisha to.” Bwà cinyi? Ûvwa mutwishiibwe nè Nzambi, uvwayè mukwàte awu, ùvwa mwà kumukùba. Àlèluuyàh! Bu bantu mwà kwenzaku ànu nànkù’s.

<sup>120</sup> Bu wèwè mwà kwikala mutwishiibwe nè Nzambi udi mukutwè byanza awu, ùdi ùnyùkusha mwoyi wèbè, ùkuvwija

cifukùibwà cipyacipyà mu Kilistò Yesù. Bubèèdi, lufù, anyì ní ncinyi cikwàbò cyònsò nànsha cilwe, wèwè udi mutwishiibwe nè Yèyè ùdi mwà kukukùba bìmpè. Bushùwà's. Amen. Mémè ntu munangè aci.

<sup>121</sup> Shamagâ, kakwàcikwètù keena bwalu butwàkaakulà dilòlò kampàndà adi, wakuumvwa bwalu bwà dîkù dyèndè bumutondè. Èyowà, yèyè ùvwa mumanyè nè bàvwa nè nzala. Kàdi beena Pelèshèètè kulwabò, cinunu cijimà, ngèèla meeji, nkàmà yisambòmbò nè byà mu njila. Ngèèla meeji nè, nkàmà yisambòmbò mijimà kulwabò bàbànda nè njila awu, bantu bavwàle byà mvità nè ku mènù. Bwalu bwà dîkù dyèndè bwakamatonda, bwalu bàvwa mwà kufwà nè nzala mu movù wà mashika awu. Kàdi wàkashààla mwaba awu, wèla meeji nè ùlonga. Cìvwayè mwà kwenza ncinyi? Wàkashààla mwaba awu too nè pàakatwishiibwayè nè Nzambì ùtu ùshààla mukwàte ku mulayi Wèndè.

<sup>122</sup> Mpindyewu, tàngilàayi cìvwayè mufwànyine kwikala mudyambidile's. "Mpindyewu, mwab'ewu, taatù wanyi Abraham, mwena cimanyinu cyà ditengudiibwa cìndi naaci mu mubidi wànyì, bwalu ndi ngùitabuuja nè Abraham ùvwa mulùme wa Nzambì. Ùvwa mutwishiibwè. Wàkashiya nzùbu wèndè. Wàkashiya byònsò byàkadiye naabi, bwà kusadila Nzambì. Nènku pa mukunà apu ditùkù adi, pàakalàmbulàye cimpàngà cyà mùkòkò aci pamutù pàà Izàkà, Nzambì wàkambila Abraham nè: 'Bwalu wénjì nùnkù, dimiinu dyèbè nedikookeshè ciibi cyà mwena lukunà.'" Ncyà bushùwà. "Dimiinu dyèbè, Abraham, ndi nkulaya nànkù. Ndi ndìcipa ku cyòci aci." Àlèluuyàh! Kaa, ekèlekèlè! Mpindyewu ngàdyūmvù mutèndeledi wa dikèma's. "Ndi ndìcipa ku cyòci aci. Abraham, dimiinu dyèbè nedikookeshè ciibi cyà mwena lukunà wadi."

Mpindyewu Shamagâ ùvwa mwà kwamba nè: "Mémè's ndi dimiinu dyà Abraham." Amen.

<sup>123</sup> Nènku pùikalà Shamagâ mwà kudyàmbidila nànkù, mwikàle dimiinu dyà mu bufùki dyà Abraham, kàdi bìshi bwà dilòlò edì, pèètù tudi Dimiinu dyà Bukalenge dyà Abraham? Kaa! Yoyòyò! Nudi nwela meeji nè ndi mupàle. Pàmwàpa mmwòmò. Ndekèlaayi kwànyì kwà tàlálàà. Ndi ndyùm vwa bìmpè mùshindù ewu kutàmba mùmvwà ndyùm vwa pàm vwa nè meeji makwàbò awu. Èyowà's. Dimiinu dyà Bukalenge dyà Abraham's! Èkèleeziyà n'Dimiinu dyà Bukalenge, dilaya adi. Nènku pùikalà dimiinu dyà mubidi mwà kwangata dikima búngì nànkù, ncinyi cìvwa Dimiinu dyà Bukalenge nè cyà kwenza, nè— nè Bwikadi bwà Nyumà Mwímpè mwikàle ànu ùlaaba maanyi eku nè eku, ùDileeja? Yoyòyò! Butùmbi's wè! Bushùwà's.

<sup>124</sup> Shamagâ kwamba nè: "Mémè's ndi dimiinu dyà Abraham." Pàakabangàye kwela meeji pa bwalu abu nè: "Nzambì wàkambila Abraham, ndi nciitabuuja, nè dimiinu dyèndè

nedikookeshè biibi byà mwena lukunà wadi. Kàdi's mbòbò abu, munkaci mwà kwenda kupicila mu ciibi cyanyi." Kwololayè ànu cyanza, kupyà dikombo dyà ngombe. Mpindyewu, kààkiimana to.

125 Yèyè kààkindila bwà kuyiila mùshindù wà kulwa mvità to, anyi kwamba nè: "Mpindyewu anji indilà kakesè. Mémè ndi Dimiinu dyà Bukalenge. Mémè ndi dimiinu dyà Abraham. Ndi mutengula. Pa nànkù, nudi bamanyès, beena Pelèshèètè bònsò aba mbalwanganyi bàà mvità bàà dipòkò. Kùkaadi ntàntà mule udibò bàlwa mvità. Nénganji kupweka ku sèminère bwà kupeta wanyi Ph.D. nè L.L.D., nènku nényiilè mwà kulwa mvità. Nényiilè kàtèshisùmù, mèyi nè mikàndù byònsò byà èkèleeziyà."

126 Wìkala mwenzè nànkù, ke cyònsò cìwwayè mwà kwikala mumanyè ní ncinyi cyònsò bwàcì . . . ? . . . Nùnkù's ùvwa kumanya ànu aci, nè kàvwa mwà kwikala mucimùne to. Dìbà adi kàvwa mwà kwikala mutwè mwena lukunà awu cyàdì to.

127 Kwèna mwà kukùngàmangana nè mwena lukunà to. Ncyèna mwà kukùngàmangana nendè to. Kàdi ndi mvùluka nè ndi nè mwoyi mwinshì mwà mulayi, àlèluuyàh, wà nè makolè èndè àkaadi mamana kutàmbiibwa, nè macimùnyibwe, nè matònkòdiibwe. "Ndi mutàmbe nè mucimunyi, mpindyewu mene." Kì mmémè nkààyanyi to, kàdi ndi munda mwà Ewu Wakamuncimwina awu, nwamònu's, nè udi nè mwoyi awu. Ndi citùpà cyà Dimiinu dyà Bukalenge dyà Abraham. Elàngànàpu meeji kakesè, pashiishe angàtà dikombo dyèbè dyà ngombe adi. Ipàtà démon wa mpatà awu kule neebè. Èyowà.

128 Wamba nè: "Ndi . . . Ncyèna mwà kuyiila kulwa mvità to." Bu yèyè mwenze nànkù, ke cyònsò cidìye mumanyè mwà kwenza aci, ànu kulwa mvità. Ke cyònsò cìwwayè mwà kwikala mwakùle aci's.

129 Leelù ewu, mùshindù awu ke wutùdì tuteeta kucyènza leelù ewu. Bantu bàvwa bàmba nè: "Ndi nè dibìikila mu nsòmbelu wanyi bwà kwikala mwambi."

130 "Èè, mpindyewu, mwanàanyi, mémè's nèmbiikilè mwèpiskòpò, nènku nèmmonèbi ní ncyèna mwà kukulekela uya mu kàlaasà, nènku udi mwà kulonga maalu à mu disòmba, nè kuyiila bintu byònsò ebi. Nè bidimu bitwè ku dikùmi mu sèminère mbifwànyine kukulongolola." Nebyenzè nànkù, bushùwà menemene. Nebimulongòlòlè mu mùshindù wà kàyiku nànsha mwà kajuukuluka kàbidì to.

131 Ndishiilangana kaayipu didiku bwà kutùma mwambi leelù ewu kutàmba mùvwàbi ku Èkèleeziyà wa kumpàlà awu's we! Kabàvwa bindile bidimu dikùmi to. Bààkindila munda mwà matùkù dikùmi. Byòbi bìkukèngela bidimu dikùmi bwà kwikala mutwishiibwè . . . Bòbò bàvwa batwishiibwe mu matùkù dikùmi. Amen. Mmufwànyine kwikala mutwishiibwe bwà dilonga dyà maalu à mu nsòmbelu, kàdi bikèngela ùpetè dilonga dyà

ditwà dyà binù panshì. Ànu matùkù dikùmi cyanààná, bàvwa batwishiiibwe, nè pashiishe bwalu bwà bakwàbò bwàkabàtonda. Bàmwè bàà kùdibo kabàvwa nànsha mene mwà kufùnda dìnà dyàbò to. Bible mmwàmbè nè bàvwa bapangi nè kabàyi balongè mukàndà to, kàdi bàvwa batwishiiibwe. Alèluuyàh!

<sup>132</sup> Mémè ncyèna ncyùka dilonga dyà kàlaasà to. Ndi mutwishiiibwe nè Yesù Kilistò m'Mwànà wa Nzambi. Ndi mutwishiiibwe nè Eci n'Nyumà Mwímpè. Ndi mutwishiiibwe nè Yèyè m'Mwondopi. Ndi mutwishiiibwe nè Yèyè m'Musùngidi. Ndi mutwishiiibwe nè Yèyè ùlwalwa. Ndi mutwishiiibwe nè *Eci* ke Cyôci aci. Ndi mutwishiiibwe. Ndi nciitabuujà.

<sup>133</sup> Mbâmbè nè mbatwishiiibwe. Cintu kampàndà ncyenzèke. Bàvwa batwishiiibwe, pashiishe bààkalwa beena bwalu paanyimà pàà bamanè kutwishiiibwa. Bààkashààla beena bwalu bwà kutwàdila bàvwa bashààle abu Díyi Dyèndè. Aci's ke cìvwà cimanyinu cìmpè cyà nè mbatwishiiibwe: bààkashààla beena bwalu.

<sup>134</sup> Kabàvwa bàcyùka bwà dilonga dyà kàlaasà to, bàcyùka bwà nè bàvwa mwà kwamba “amen” ànu mu yèyè menemene. Kabàvwa bàcyùka nè mbàà mu bulongolodi kaayi to, anyi ní bàvwa nè kartà kàà buumambàlà, anyi to. Bàvwa batwishiiibwe nè cyònsò cìvwà cibàkèngela cìvwa n'Yèyè.

<sup>135</sup> Nènkù mémè ndi mùshindù wùmwèwùmwè awu dilòlò edi. Ndi mutwishiiibwe nè cyònsò cidì citukèngela n'Kilistò. Kabyèna bitùkèngela mulombodi mupyamùpyà wa cimenga to. Kabyèna bitùkèngela bamfùmù bàà ditùnga bapyabàpyà to. Kabyèna bitùkèngela cilwilu cipyacìpyà to. Kabyèna bitùkèngela bómbe bupyabùpyà to. Bidi bitùkèngela Yesù.

<sup>136</sup> Ke cyònsò cìvwàbò—cìvwàbò batwishiiibwe bwàcì aci. Nè bàvwa kàbidi biitabuujà nè Yèyè ùvwa mwà... Bàvwa batwishiiibwe nè Yèyè—Yèyè ùvwa mwà kukùmbaja byònsò bìvwàbò naabi dijinga abi.

Wèwè udikù mutwishiiibwe nànkù, dilòlò edi anyi?

<sup>137</sup> Wàmba nè: “Ndi mutwishiiibwe. Nànsha cinyi cilwè kumpàlà kwànyi, Yèyè neàcitwè cyàdi. Cidì mwà kulwa kumpàlà kwànyi nànsha ciikàle cinyi, ndi mutwishiiibwe nè Yèyè neàtangilè bwalu bwànyi. Mmwambè nè nèÀcyènzè.”

<sup>138</sup> “Nèngìikalè neenù, munda mwènù mene, too nè ku ndekeelu kwà cikondo. Kanwèdi meeji bwà mààlabà to, yèyè nkààayèndè neàdyelèlè meeji.” Ncyà bushùwà, anji ela meeji ànu bwà leelù ewu. “Piikalà Nzambi muvwàdike budimi, nè mashindà à mu budimi, àdi miikàlekù leelù ewu aa, mààlabà kaàciyiku to; nè piikalàYe mwà kwela meeji bikùmbàne bwà nè nànsha mene mushààmushà kawùvwa mwà kumata mu mùsèsù Yèyè kàyi mucìmanyè to,” mmisangu bùngì kaayi mitàmbe mùdiYe mumanyè bwà bidi bitàngilà majinga ètù?

139 Ndi mutwishiiibwe. Kè bwà cinyi kanwèna nummòna nsengeleelangana bwà milàmbù, ne *cikampàndà*, *cikansanga* to. Ndi mutwishiiibwe. Mémè mushààle nè Dîyi edi, Nzambì neàshaalè naanyi. Ndi mutwishiiibwe. Kabyèna bikèngela bwà bifidiibwe to, nebilwe mùshindù kampàndà. Ndi—ndi—ndi, ànu—ànu mutwishiiibwè. Ndi ncùtabuuja. Ndi ngùtabuuja Dîyi dyònsò dyàkambàYe. Ndi mutwishiiibwe bwà Dyòdi adi. Ndi mutwishiiibwe nè Yèyè neàkumbajè makèngela ónsò àndi nkèngela awu. Kabyàkukèngela bwà mémè kuditàcisha bwà bwalu abu to.

140 Nè yèyè ùvwa kàbidì mutwishiiibwe nè kabàvwa bàkèngela musumbà wà maalu à nsòmbelu, nè bintu bikwàbò byònsò ebi, bwà kubyàngata to. Bàvwa batwishiiibwe nè aba bàvwa . . . bôbò—bôbò bààkayiisha, ke cyònsò civwàbo naaci dijinga, civwàbo nè cyà kwikala naaci.

141 Ke lutàtù lùdiku leelù ewu alu's. Bàdi bàteeta kubweja bintàkanyi bikwàbò munda mwàbò, twitabàayi, nè bintu byà mùshindù awu. Kacya kùtu mwànji kwikala mutwishiiibwe nè Nyumà Mwímpè ngwa cyà bushùwà to. Ke cyònsò cidi cinkèngela aci's. Ke cyònsò cidi cikukèngela. Ke cyònsò cidi cikèngela muntu mukwàbò kanà yònsò ewu aci's.

142 Mwva nsangayiibwa mu Àfrikè matùkù mashààle aa. Bàvwa bàteeta kulongesha bantu abu tùlaasà, nè bifuku abi. Nènkù díbà dyùdi ubàfikisha kùdi muntu mutòòke, bàdi bàngata mpèkaatù wa muntu mutòòke awu. Bàdi nè mpèkaatù wabù bôbò wa sungasunga mu cifuku amu. Bàmutwàlamù, ùdi wàngata mpèkaatù wa muntu mutòòke, díbà adi ùdi ùvwijiibwa mwànà wa mu ifernò misangu yibidi, kutàmba mùvwàye kwònsò eku. Cintu ànu cimwèpelè cidi cìmukèngela. Bìdi bimukèngela Kilistò. Amen.

143 Hudson Taylor, musangu kampàndà. Kacya kanùtukù bánji kuumvwa bwalu bwà Hudson Taylor, mpàndànjilà munène awu, wa mu Chine anyi? Kùvwa nsongàalùme wa citende wa ba-Indiens. Wàkasùngidiibwa, kwambayè nè ùvwa nè dibìkila dyà ku mudimu wà bwambi. Wàkalwa kwambila Mukalenge Taylor, kwamba nè: “Mukalenge Taylor, bìdi bikèngela bwà mémè kulonga maalu à mu nsòmbelu mu bidimu binaayi,” nè bintu bishiiilèshiiilàngàne bìvwà bikèngelà bwà kwenzayè: “nènkù nebìngangàtè ntàntà bule kaayi, bwà mémè kupeta dipòlomè dyànyi dyà Licencié?”

144 Mukalenge Taylor kumwambilayè, wàmba nè: “Mwanàanyi, kùbùtwishikù ka—kàndeyi cyàbìbìdi cijimà kumpàlà kwà wèwè kubanga to.” To.

145 Aci's ke cìndi ngèèla meeji, mémè pàanyi. Kwindidi too nè pààbùtuka cyàbìbìdi cyà kàndeyi to, nè dilonga dyà mùshindù kampàndà dikwela munda, bwanga kampàndà bwà dilama naabù citalù. Kwènji nànkù to. Kàdi ndi ngàmba

nè, pàdì ànu kàndeyì kateemesha, bangishà. Ncyêna nteeta bwà kutwà dipanga nyama ku mikòlò to, kàdi cìndì njinga kwamba ncyôci eci. Wêwè kùyì mumanyè cikwàbò cintu nànsha cimwè to, bambìlè ànu mùshindù wùdi kàndeyì kateemè. Ke cyònsò cidìbo nè cyà kumanya aci's. Bambìlè cidì citeemèshe kàndeyì. Bambìlè cidì cilàkukamù nè kapyà aci. Bambìlè ànu mwàkateemàku. Bateemeshiibwè, bôbò—bôbò nebàtàngile bwalu bwà bìdì bishààla abi. Cyà bushùwà's.

<sup>146</sup> Kabyèna bikèngela bwà wêwè kulonda to, kupicila mu mùshindù wònsò wà myàkù minène yùdi kùyì mene mumanyè wêwè mwinè to bangabanga, nè yìdì kayìyi nè cidìyi yùmvwija nànsha cimwè paanyimà pàà wêwè mumanè kuyìmanya to. Nwamònu anyi? Bámblè ànu nè: “Butùmbì kùdì Nzambì's wè! Nyumà Mwìmpè mmundengè, nè mèmè ndi muntu mushiilàngàne.” Bambìlè mùdi kàndeyì katème. Kwìndidi pààbùtukàku to; bwalu pashiishe cidìku's mmwìshi ànu pa mwìshi dìbà adi. Bàà nànkù bàdikù bààbùngì leelù ewu. Bambìlè ànu mwàkateemàku.

<sup>147</sup> Mpofo wàkapèèshabù lumònu kùdì Yesù kuntu kwàka awu, s'bàvwa mu makòkyanganyi à menemene bwà bwalu abu's. Nudi bavùlùke pààkapitàyè mwaba awu, bayìidi kwambabò nè: “Udi mwenzè mpèkaatù nganyì, nyèyè, mmamwèndè, anyi ntatwèndè?”

<sup>148</sup> Yesù wàkamba nè: “Nànsha umwe. Kàdi mbwà byenzedi byà Nzambì bìmonè mwà kumwèneshiibwa.” Ke kumupèèshaYè lumònu lwèndè.

<sup>149</sup> Ke bafùndi bònsò nè Bàfaalèsà kujuukilabò kuulu. Nè tatwèndè nè mamwèndè bàvwa nè bwòwà bwà lufù, bwalu bàkaavwa bamanè kwamba nè: “Muntu yèyè mudìdinge mutèèlèje Yesù wa mu Nazalèetà awu, Mupròfetà awu, nebàkupèèshè ànu mukàndà mukufùndila kùdì èkèleeziyà. Udi wipaciibwa.”

<sup>150</sup> Kì mbacishintululekù to nànsha kakesè. Nwamònu's, byà mwomùmwè! “Muntu kanà yònsò ewu udi uMutèèleja awu, anyi ùya mu disangisha Dyèndè, wêwè udi ànu mukùpùdìibwe mu èkèleeziyà, ànu pa cibànzà.” Bàdi bàkùpula dìnà dyèbè buludì mu mukàndà.

<sup>151</sup> Ke kuyabò kangata tatwèndè nè mamwèndè, kwambabò nè: “Ewu mmwanèènu wa balùme anyi?”

<sup>152</sup> Bôbò nè: “Èyowà's, n'yèyè's.” Bôbò nè: “Tudi bamanyè nè ewu mmwanèètù wa balùme, nè tudi bamanyè nè yèyè ùvwa mulediibwè mpofo.”

“Èè,” mwàkambabo, “mmunyi mùdiye mupete lumònu lwèndè?”

Bôbò nè: “Mukonkaayi. Ùkaadi muntu mukolè.”

Bóbò nè: “Pèesha Nzambi butumbi. Muntu ewu nngenzàmpèkààtù.”

153 Mòna’s, yéyè kàvwa mwà kukòkangana naabò bwà tèlòlòjì to. Nànsha kakesè. Kàdi kùdi cintu cimwèpelè civwàye mumanyè bulelèlà. Ùvwa mutwishiibwe nè ùvwa mwà kumòna. Yéyè nè: “Ìkalè ngenzàmpèkààtù anyi to, ncyèna mumanyè to. Ncyèna mumanyè nè mmu cilongelu kaayi mùdiYe mufùmìne to, anyi cintu nànsha cimwè pa bwalu abu. Kàdi ewu’s ke mwaba ùmwè mwìmpè ùndi muimànyìne: mèmè ewu mvwa kale wàwa mpofo, ndi mutwishiibwe nè ndi mwà kumòna; bwalu Yéyè wàkangambila nè mvwa mwà kumòna, nè mèmè kuMutèèleja.” Àlèluuyàh!

154 Cintu cimwècimwè aci nè mèmè. Kale wàwa mvwa mpofo, kàdi mpindyewu nkàadi mmòna. Musangu kampànda ncivwakù mwà kumòna Cyòcì eci to. Mvwa ngenzàmpèkààtù. Yéyè kukàngula mèsù àanyì. Mwaba wùmvwà kale wàwa mpofo, ndi mmòna mpindyewu.

155 Ùvwa nè bwalu bwìmpè bwà kwamba, bushùwà menemene, mu mùshindù wà nè kabàvwa mwà kumutwisha nyimà panshi to. Bwà cinyi? Ùvwa mutwishiibwe nè ùvwa mwà kumòna. Nènku ùvwa mutwishiibwe nè. . . Kwambayè nè: “Ncintu cyà pabwàcì mpindyewu. Nudi nudizànjika, nwènu bakwètù aba, nè nudi balombodi bàà butèndeledi bàà ditunga edi. Kàdi nudi nwamba munùdi kanùyì bamanyè kùdi Muntu ewu mufùmìne, kàdi’s n’Yéyè ewu mwenze cishimà pa mèmè, cìtù kacya kaciyìku cyànji kwenjiibwa pa buloba to. Aci’s ncintu cyà pabwàcì.”

156 Mwanèètù, ndi ngèèla meeji nè yéyè mmwena tèlòlòjì mulenga wa dikèma, ku cyòcì aci. Bwà cinyi? Ùvwa mutwishiibwe. Ùvwa nè cintu kampànda cyàkamutwishà. Ùvwa mpofo; ùvwa mwà kumòna.

157 Davidi, pàakafikàye ku cilwilu cyà Shawùlà, Goliyàtà ku luseke lukwàbò alu, Davidi ùvwa muntu wa mutàmbe bukesè mu musumbà awu. Goliyàtà ùvwa mutàmbe bunène. Shawùlà ùvwa mwà kwikala mutàmbe kukumbanyina. Shawùlà ùvwa wìpacila ku metèlè àbìdi, ngèèla meeji, anyi mupìte apu, pàmwàpa metèlè àbìdi nè citùpà nè: “Mutù nè makaaya kumutù kwà muntu yònsò mu cilwilu cyèndè.” Nè Davidi ùvwa muntu mutàmbe bukesè wa ku bònsò mwaba awu, nè yéyè ke uvwa muntu umwèpelè uvwa kàyì mulongèshiibwe mwaba awu. Kàdi, mwanèètù, ùvwa mutwishiibwè. Butumbi’s wè! Nwamònu anyi? “Ndi muswè kumwèka mùndi emu.”

158 Mònaayi. Kàvwa mulongèshiibwe to. Kàvwa nè mafùmà to. Kàvwa nè civwàye mumanyè pa bwalu abu to. Kàdi yéyè ùvwa ànu kaamuntu kakesè kakünzùbile. Kàdi ùvwa mutwishiibwe, nè civwà cìmutondà mbwalu bwa cilwilu civwà cìdìbìkila cyòcì ciinè nè: “cilwilu cyà Nzambi udi nè mwoyi aci.” Nènku ùvwa mutwishiibwe nè Nzambi, Uvwa mumukwàcishe nè ndundu wa

nyuunyi awu, bwà kushebeya nyama wa ntambwe nè nyama wa ours, ncyà bushùwà nè ùvwa mwà kuumusha mwena Pelèshèètè udi kàyì mutengula awu. Ùvwa mutwishìibwe, dîbà adi bwalu bwà cilwilu kubanga kumutonda. Nànsha bàmba nè ùvwa nè. . . Wèwè mutwishìibwe dîbà adi udi ushààla mwena bwalu, kàdi bikèngela wánjì kutwishìibwa, dyàmbedi. Pa nànkù, yèyè ùvwa mutwishìibwe.

<sup>159</sup> Ndi mvùluka dilòòlò kampàndà, dilòòlò dyà luuya lukolè dyà menemene, mu nyùngulukilu mwònsò mwènza bwòwà, mutàngìle ku mvità. Kaa, mpùngà yà dyàkalenga kayìvwa luseke lwènde to. Ke kusambilayè. Ùvwa mulààle pambèlu apu mwínshì mwà mucì wà mùriers. Cilwilu cikaavwa cimanè kudilongolola, pambèlu apu bwà kutwilangana nendè. Yèyè mulààle mwínshì mwà mucì wà mùrier ewu. Kàdi paanyimà pàà katanci kampàndà kuumvwayè cintu kampàndà munkaci mwà kulwa, kàdi kutùngunuka nè kupicila mu bikùtù byà micì yà mùriers abi, nè kutùngunuka kuya luseke lwàbò alu. Yèyè ùvwa mutwishìibwe's, mwanèètù. Nànsha mùvwà mpùngà yà dyàkalenga ayi mwà kwikala, yèyè ùvwa mutwishìibwe nè Nzambì wàkabwelamù, kumpàlà kwèndè.

<sup>160</sup> Nwènú balùme, bu nwènú mwà kwimana kaaba aka, dilòòlò edi, nànsha cidì cinùtácisha ciikàle cinyi; bu wèwè mwà kuumvwa cipeepèlè cyà civuma cyà Nyumà Mwímpè aci cìpicila munda mwèbè, wàmba nè: “Mémè ndi Mukalenge udi wondopa màsaamà èbè ònsò. Ndi nkwòndopa mpindyewu.” Wèwè mwà kwikala mutwishìibwe, mwanèètù, kwèna mwà kucyùka cidì cìsanganyibwa pambèlu pààpa to, wèwè's ukàadi mumanè kumanya nè necyènzekè. Cyà bushùwà.

Yèyè ùvwa mutwishìibwe nè pashìishe yèyè kushààla mwena bwalu.

<sup>161</sup> Shimishòònà mwimàne kumpàlà kwà beena Pelèshèètè, ànu nè mufùbà wà lubàngà lwà kampundu mu cyanza cyèndè, yèyè kàvwa—yèyè kàvwa mene nè byà mvità to. Kàdi yèyè ùvwa mutwishìibwe nè Nzambì wàkamubiikila awu, ùvwa nè bukolè, nè mufùbà wà lubàngà lwà kampundu awu, bwà kushebeya beena Pelèshèètè aba. Kàdi kushebeyayè cinunu cijimà.

<sup>162</sup> Mupròfeta munyeemakanyi awu, Mòsà, pààkatwishìibwà Mòsà nè ùvwa n'Nzambì mu cipuka aci. Nudi bamanyè's, Mòsà kàvwakù mwanjì kwenza dilabula nànsha dimwè nè Nzambì to, ùvwa nè tèlòlòjì búngì cyanàànà. Kàdi ùkaavwa munyeeme muyè. Kàdi pààkatwishìibwàye nè Ùvwa n'Nzambì mu cipuka. . . Bwalu, Díyì kwakwiladi mu cipuka aci, dimutèelela Mufundu, nè ùvwa mutwishìibwe nè Awu ùvwa n'Nzambì. Ke Nzambì kwambaYè nè: “Mémè nèngìikalè neebè.” Nudi bamanyè's, yèyè ùkaavwa mujìmìje dicyùka dyònsò mu Èjiiipitù. Ùkaavwa kuntwaku bidimu makùmi ànaayi, pààbò bashààle bàyooba nè buipika. Kàdi pààkatwishìibwàye nè cìvwa ndiswa dyà Nzambì

bwà kubàsungila, wàkatàmba kushààla mwena bwalu ànu ditùkù divwà dilondà adi.

163 Ke yèyè udi upweka nè njila ewu. Nudikù bafwànyine kudifwànyikijila civwà mubandidi mwà kumòna anyi? Nè Sefòra musòmbesha pa kampundu, nè Gelèshòmà mupàya ku lubèsè lwèndè, mwedi mulembelèlè mùshindù ewu, nè bidimu makùmi mwandamukùlù, mutù wà dibàla munkacì mwà kwengelela ku dibà, nè dikombo dikònyàngàle mu cyanza, wènda wèla mbilà nè: “Àlèluuyàh! Ndi mpweka mutàngile mu Èjiipitù bwà kuya kakwàta ku bukòokeshi!” Eyowà’s.

Cidi mwà kukwenzeja maalu à pabwàwù.

164 Cìvwa cìfwànyine kwikala cimwenzèje maalu à pabwàwù, kàdi ùvwa mutwishiiibwe. Bwà cinyi? “Nènye neebè, Mòsà. Nèngàngatè dikombo didi mu cyanza cyèbè edi, nè Nènsungilè cisàmbà Cyànyì.” Mpindyewu, dikombo dikesè dyà kale adi kadivwa dimwèka nè mushinga menemene to, kàdi, mwanèètù, ùvwa mutwishiiibwe bwalu Dìyì dyà Nzambi divwa naadi.

165 Wèwè mumanyè nè Dìyì dyà Nzambi didi neebè, nè munda mwèbè, udi mwà kwikala mutwishiiibwe.

166 Bàna bàà beena Ebèlù abu, bàvwa batwishiiibwe nè Yèyè ùvwa nè bukolè bwà kulama Dìyì Dyèndè, èyowà’s, pàvwàbo ànu bafwànyine kushààla biimànePù. Nzambi wàkabàmbila bwà kabìnaminyi mpìngù to. Ke cyòci aci menemene civwà Nzambi muswè kwamba. Nè bàvwa bamanyè nè bòbò kabàyi biinàmìnè lupìngù alu to, Nzambi ùvwa mukùmbàne kushààla mukwàte ku Dìyì Dyèndè. Bàvwa batwishiiibwe nè ke civwàYe. Nè pashiishe pàakatwishiiibwàbo bwà kutwà ku Dìyì Dyèndè, Nzambi wàkashààla mwena bwalu bwà kutwà ku cyàbò.

167 Paùdi mutwishiiibwe nè Eci n’Dìyì dyà Nzambi, Nzambi ùdi ùshààla mwena bwalu bwà kutàngila bwalu bwèbè nè Dyòdi adi. Ntu muCiteetè, mu madimi à bwambi à ku baabèndè nè myaba yònsò, paùdi mutwishiiibwe nè nCilelèlè. Kàdi, bikèngela wìkale mutwishiiibwe, dibà adi Nzambi neàkutàngilè. Kàdi, dyàmbedi, udi nè cyà kwikala mutwishiiibwe nè n’Yèyè, nè Yèyè ùtu ùshààla mukwàte ku mulayì Wèndè, dibà adi Nzambi ùdi ùshààla mwena bwalu abu.

168 Martà ùvwa mutwishiiibwe nè bu Yesù mwà kulòmba Nzambi, cintu necyènzekè. Yèyè nè: “Cidi ní nganyì yònsò wa kùdìbo wàmba nànsha ciikàle cinyi. Nànsha bu mwanèètù wa bakàji Màriyà kàyì muciiitàbùùje to. Mèmè ncyèna ngiitabuujakù, ncyèna ncyùkakù cidi laabi wàmba to. Kàdi, Mukalenge, bu Wèwè mwikalepù, nùнку mwanèètù wa balùme kí mmufwè to.” Ke Yèyè nè. . . “Nànsha mpindyewu, ndi mutwishiiibwe nè, bu Wèwè mwà kulòmba Nzambi, Nzambi neàKupèèshèci. Necyènzekè. Ndi mpwekakù buludì, búngulujàayi dibwe adi. Nèndilongòlòle bwà bwalu abu. Ndi mutwishiiibwe.” Bushùwà.

169 Ndi mvùluka taatù wanyì, lwà mu Kentucky mwàmwa, kùkaadi bidimu. Byà pa madimi bìvwa byònsò munkaci mwà kwoshika. Ke muyiishi wa kale mutàmbakanyi awu kupicilayè mwaba awu, nè yèyè ùkaavwa muntu mununu mulenga wa dikèma. Pààkatwàye binù panshì, wàkashààla mwaba awu too nè pààkenzekà cintu kampàndà. Ditùkù adi, bàvwa bònsò baswè kusambila bwà mvùla kulwaye. Papa kwamba nè, pààkatwà mununu awu binù, ke yèyè kumònayè byanza byèndè bikùlákàje byà minyèngu abi byela muulu mu lupeepèlè, kwambayè nè: “Éyi Nzambi, ndi muKukwàcìle mudimu. Bantu aba mbèèbè Wèwè, kàdi byà pa madimi byàbò bìdi munkaci mwà kwoshika.” Papa kwamba nè wàkadifinda kupàtuka mu èkèleeziyà, nè kuya pambèlu apu nè kuumusha cibàsà cyà cisòmbedi pa kampundu kèndè, kucikùpayè mwínshì mwà èkèleeziyà, bwalu ùvwa mumanyè nè mvùla ùvwa nè cyà kulòka. Mutwishiiibwe, èyowà’s, mukalenge, dîbà adi wàkatàngila cilùmbù cyà cisèbà cyèndè aci. Paanyimà pàà wèwè mumanè kutwishiiibwa’s!

170 Marta wàkamba nè: “Bu Wèwè mwikalepù, nùnkmu mwanèètù wa balùme kí mmufwè to. Kàdi nànsha mpindyewu, cyònsò cyùdi Wèwè ulòmba Nzambi aci, Nzambi neàKupèèshèci. Ncyà bushùwà. Ncyènzekè, bu Wèwè mwà kulòmba Nzambi.” Abi kí mbilenga bilayà anyì?

171 Yayilò, nè citàlù mu nzùbu mwèndè, mwanèndè umwèpelè mulela, wa bidimu dikùmi nè bibìdì, mwànà mukèsè wa bakàji. Mukenji kulwawù nè: “Lekèla kutàcisha Mfùmù to, bwalu ùkaadi mumanè kufwà.” Ke Yesù kwamba. . .

172 Dyàmbedi, wàkambila Yesù nè: “Mwanàanyi mukèsè wa bakàji ùkaadi mufwè patùdi twakulangana apa, kàdi ndi mutwishiiibwe.” Àlèluuyàh! “Lwàkù, ùmutentèkèlè byanza, yèyè neàsàngalè.” Mutwishiiibwe’s!

173 Ùvwa mùmvwè bààkula bwà Yesù. Ùvwa mumanyè byenzedi Byèndè. Ùvwa mwena kwitabuuja wa mu musokoko. Munda mwà mwoyi wèndè, wàkiitabuuja nè awu ùvwa m’Mwànà wa Nzambi. Ùvwa mutwishiiibwe ànu menemene nè ke mùvwàbi. Nudi bamanyè’s, aci kí ncyà pabwàcì anyì? Nzambi wàkamwenzeja bwalu abu.

174 Nzambi’s mmumanyè mwà kukwenzeja. Cyà bushùwà. Misangu mikwàbò Ùdi ùkupèèsha bubèedi, byònsò bikwàbò, ànu bwà kukwenzeja cyòcì aci, bwà kuleeja diikala dyèbè, cyùdi aci.

175 Wakamwenzeja. Yayilò ùvwa mwenzèjiiibwe bwà kuciitabuuja. Ke pashiiishe kuleejayè civwàye. Yèyè nè: “Bu Wèwè mwà kulwa, kutentekela mwanàanyi wa bakàji byanza, nànsha mùdiye mufwè amu, neikalè nè mwoyi.” Kaa, ekèlekèlè! Mèmè ntu muswè aci.

Ndi ngèèla meeji nè, Marta wàkamba cintu cìmwècìmwè aci.

Yesù ùvwa mutwishiiibwe bwà Cyòcì aci, pèndè.

176 Disàlaayi dyà beena Loomò adi, kààmàndà kàà màsàlaayi lukàmà aku, ùvwa mutwishiiibwe nè, bu yèyè ànu mwà kufikisha Yesù ku dyamba Dîyi. Tèelejààyi mùsàlaayi awu, mwena Loomò, wa bàà Bisàmbà byà bendè, mumpàngaanù. Yèyè nè: “Mémè ndi muntu udi ku bukòokeshi. Ndi ngambila muntu *ewu*, mùsàlaayi ewu nè: ‘Ndaaku *apa*,’ nè yèyè ùyaaya. Nè ndi ngambila *ewu* nùnkù nè: ‘Lwàkù,’ nè yèyè ùdi ùlwa.” Bwà cinyi? Yèyè ùvwa kumutù kwèndè. Yèyè ùvwa ùfila bujaadiki bwà cinyi? “Yesù, Wèwè udi kumutù kwà màsaamà ònsò. Udi kumutù kwàwù ònsò. Bu mémè ànu mwà kuKuumvwa wamba Dîyi, musadidi wanyì neikalè nè mwoyi. Ndi mutwishiiibwe mu kantu nè kantu.”

Nè pashiishe, paanyimà pàà byònsò abi, twètù katwèna ànu bânji kutwishiiibwa to. Nwamònu anyi?

177 Cìvwa ncinyi? Yesù wàkamba nè aci cìvwa ndiitabuuja dinène. Yèyè kàakapetakù aci mu Izàlèlèlè to. “Akùlà ànu Dîyi cyanààna.”

178 S’ki Cyòci eci, *Apa* mene. “Paùdi usambila, itàbùùjà nè udi upeta cyùdi mulòmbe aci, nènku neùcìpetè. Wèwè mwambìle mukùnà ewu nè: ‘Tentèmùkà,’ nè kùyì wela mpatà munda mwà mwoyi wèbè to, kàdi witabuuja nè ciwàmbi aci necyènzekè, udi mwà kupeta ciwàmbi aci.”

179 Pashiishe kujikula. Cinyi? “Ku mibùndàbùndà Yèndè ndi mwondòpiibwe. Ku ngàsà Wèndè nkùndi musungidiibwe. Ku mulayi Wèndè mémè nèntumikilè, nè nèngùùjiibwè tètè nè Nyumà Mwimpè.” Ke bwalu mbwòbù abu’s, wèwè mutwishiiibwe nè Yèyè ùtu ùshàala mukwàte ku Dîyi Dyèndè. Kàdi dyàmbedi bikèngela ùtwishiiibwè.

180 Mukàji uvwa nè mashi àlwa munda awu, ùvwa mutwishiiibwe; cìvwà laabi mwambè nànsha ciikàle cinyi, nè cìvwà mwakwidi mwambè, nè cìvwà bàyèndè mwàmbè, nè cìvwà muntu mukwàbò kanà yònsò ewu mwàmbè. Yèyè nè: “Awu’s m’Muntu wa cijila. Yèyè’s m’Mwànà wa Nzambì. Nènku bu mémè mwà kulenga luzemba lwà cilàmbà Cyèndè, ke cyònsò cidi cikèngelà bwà mémè kwenza. Ndi mutwishiiibwe nè nèngùmvwè bimpè.” Nànsha mùdi ngàngàbukà wamba nè kèna mwà kuumvwa bimpè amu, kàdi kwambayè nè: “Ndi mwà kuumvwa bimpè bu mémè ànu mwà kulenga luzemba lwà cilàmbà Cyèndè.” Ùvwa mutwishiiibwe.

181 Mukàji wa ku ciinà cyà màyi awu ùvwa mutwishiiibwe nè Yèyè nguvwa Maasiyà awu, pàvwàye mumòne cimanyinu cyà mu mifundu aci, cyà nè ùvwa mumanyè cìvwà Maasiyà nè cyà kwikala. Ànu mùngàmbi mu dindà emu nè, mwoyi mudyànjila kulongolola awu wùvwa wùsanganyiibwa mwaba awu. Nènku yèyè mmwenzè ànu. . . Ówò, màyi à luuyà àvwa àpòngoloka. . . Màyi à cyashima’s, èyowà, àpòngoloka pa Dîyi dyà mwoyi divwà Nzambì mudyànjile kulongolola ku difukà dyà dyulu nè buloba adi, yèyè wàkaCimòna nè lùkàsà lwònsò mùshindù

*awu.* [Mwanèètù Branham ùdi ùtuuta cishòndò—Muf.] Piinè apu, mpàvwà bambi mwaba awu, kabàyi baCimòne to; baakwidi bàvwà kabàyi baCimòne abu; baakwidi bakulù kabààkaCimòna to; balombodi banène bàà èkèleeziyà kabààkaCimòna to; baCibiikila nè “démon.” Kàdi ndumbà mukesè, mukwàte nè byà luse awu kuntwaku, Nzambi ùkaavwa mudyànjlile kulongolola cyòci aci kacya ku difùkà dyà dyulu nè buloba. Wèwè ànu mufikekù, ki mùvwàbi, bwèbè pèèbè.

<sup>182</sup> Mpindyewu, Bible mmwàmbè nè: “Mu matùkù à ndekeelu, mufwìlakanyi nè Kilstò ùvwa mwà kwikala mutèndeledi wa dikèma, nè bintu byàbùngì bifwànàngàne nè cintu cilelèlà, bu mùshindù wà bifwànyine kuseeswisha nè Basungula mene bu nè bìvwa mwà kwenzeka.” Kàdi, kabyèna mwà kwenzeka to. Ncyà bushùwà. Nènku, *bònsò*: “Yèyè ùvwa mwà kuseeswisha *bònsò*, pa buloba, beena ménà avwa kaàyi mafùnda mu Mukàndà wà Mwoyi wà Mwànà wa mùkòòkò abu.” Kacya ànu ku ditàbuluja dyà ndekeelu anyi? Aci kacýèna cyùmvwika bu Bible to, mmwòmò anyi? [Disangisha didi dyàmba nè: “To.”—Muf.] “Kacya ànu ku difùkà dyà dyulu nè buloba.” Kwàkubàseeswisha to, bwalu bàdi bàsanganyiibwa ànu mu Díyì adi mene. Pàdìbo bà mòna bintu abi bìmwènèka, Didi Mwoyi, bàdi bàDyùmvwà mpindyewu mene. [Mwanèètù Branham ùdi ùtuuta cishòndò.]

<sup>183</sup> Bakwàbò nebàseemenè, bàmba nè: “Aa, kaCyèna nè bwà nsongo to. Huh!” Nwamònu anyi? Kì mbatwishiiibwe to. Kakwèna cintu nànsha cimwè muntwamu bwà kubàtwishisha to. Kakwèna cintu nànsha cimwè munda mwàbò to, bwà kwitabuujaò naaci.

<sup>184</sup> Maamù ùvwa nè ciibidilu cyà kwamba nè: “Mmunyi mùdi mwà kupetela mashi mu tuunèpà pàdìmu kamùyi mashi to?” Cyà bushùwà.

<sup>185</sup> “Mikòòkò Yànyi yidi yùmvwà Díyì dyà mukana Mwànyi.” Mmimanyè Díyì. Díyì Dyèndè ncinyi? S’ki Dyòdi *edi*. Kayèna yilonda twitabààyi eyi to. “Kàdi, yidi yùmvwà Díyì Dyànyi, yidi yìDilonda.”

<sup>186</sup> Mukàji wa ku ciinà cyà màyi ùvwa mutwishiiibwe mu kaabujimà. Dìbà adi yèyè wàkadyùmvwà bwà cisàmbà cyèndè bumutondà bwà cyàmòna pàaci cimanyinu aci nè kuCiitabuuja, paanyimà pàà yèyè mumanè kutwishiiibwa nè Awu ùvwa m’Maasiyà. Bwalu, Yèyè wàkamwambila mwaba wùvwà lutàtù lwèndè. Yèyè kwamba nè: “Mukalenge, tudi bamanyè nè pààlwà Maasiyà, Yèyè neenze aci.”

<sup>187</sup> Yèyè nè: “Mèmè ki Yèyè awu.” Ùvwa mumanyè muntu uvwa mwà kwenza cintu aci awu ncyà bushùwà nè uvwa mwà kwamba Bulelèlà. Butùmbi kùdi Nzambi’s wè! Èyowà, muntu udi Nzambi mufwànyine kukwàta nendè mudimu mwà mùshindù awu kì mmufwànyine kushima to. Cyà bushùwà. Yèyè neàkwambilè Bulelèlà. Yèyè nè: “Mèmè s’ki Yèyè awu.”

188 Kàdi ùvwa nè disànkà dyàbúngì pààkabwayika Bukènkè abu pa Díyì adi, kubwelayè lubilu mu cimenga. Ùvwa mutwishiibwe mu kantu nè kantu. Nànsha byòbì bimwanyishila bwà yèyè kwenza nànkù, anyì to, kubwelayè lubilu mu cimenga nè kwambila baalaabì nè baakwidi abu, nè bantu bònsò mu mìsèèsù, bantu bàà mu cisalu, nè lwà mu cisumbishidi cyònsò cyà byàkudyà amu. Ke kubanda kupweka nè mùsèèsù, wènda ùfila bujaadiki nè: “Lwáyì, kanùmonàayi Muntu Udi mungambile bintu bìndì mwenze. Angàtaayi Bible wenu. Tàngilàayi mu mukàndà muvùnga. Aci kí m’Bulelèlè nè, Awu ke Maasiyà mene awu anyì?” Ùvwa mutwishiibwe. Yèyè neàjuukè ku cilumbulwidi nè neàpiishè binunu byà bantu bàà mu États-Unis emu. S’ncyà bushùwà nè neènze nànkù.

189 Nudi bamanyè’s, Yesù wàkamba nè: “Mukalenge-mukàjì wa ku sud neàjuukè ku cilumbulwidi, neàbàpiishè, bwalu wàkalwa bwà kutèèleja dipà dyà lungènyì, òvwà naadi Solòmò, dijingulula.” Nè wàkamba nè: “Munène mutàmbe Solòmò ùdi apa.” Bushùwà. Kàdi nànsha nànkù bantu kabàvwa ànu bafwanyine kuMwitabuja to. Bushùwà’s.

190 Yèyè’s ùvwa mutwishiibwe, nè ùvwa muswè bwà cisàmbà cyèndè cìkale citwishiibwe. Nwamònu anyì? Paanyimà pàà mumanè kutwishiibwa, pashiishe wàkadyùmvwa bwalu bwà cisàmbà cyèndè bumutondè. Ùvwa mumanyè nè Yèyè awu ùvwa m’Maasiyà. Ùvwa mumanyè nè ke cidì Bible mwàmbè nè necyènzekè pàvwà Maasiyà nè cyà kulwa.

191 Yèyè nè: “Tudi bamanyè nè Maasiyà, udi ubiikidiibwa nè Kilistò awu, pààlwàYe, Yèyè neàtwàmbilè maalu awu. Kàdi Wèwè udi nè cyà kwikala mupròfetà.”

Yesù wàkamba nè: “Mémè s’ki Yèyè awu.”

192 Ke yèyè awu mutwishiibwe, bwalu ùvwa mumanyè nè Mifùndu yìvwa yàmba nànkù, kàdi’s ke Cyòci eci. Ùvwa mutwishiibwe, pashiishe wàkadyùmvwa mwena bwalu. Wàkaya bwà kwambila muntu kampàndà mukwàbò.

193 Mpindyewu, Yesù ùvwa mutwishiibwe nè Ùvwa mwà kubiika ku lufù mu ditùkù diisàtù. Wàkatwishiibwa bikolè, kwambaYè nè: “Shimbùlaayi ntempèlù ewu, nè Mémè nèmumujuulè mu ditùkù diisàtù.”

194 Bwà cinyì? Davidi, mu Mifùndu, mu disonsodiibwa, mmupròfetà. Davidi ùvwa mupròfetà, nudi bamanyè’s. Davidi, mu disonsodiibwa, wàkamba cipròfetà, nè wàkamba nè: “Ncyàkulekela musùkà Wèndè mu ifernò, anyì Ncyàkwitaba bwà Wa Cijila Wanyì àmonè dibola nànsha.”

195 Nè Yèyè ùvwa mumanyè nè musangu kampàndà munda mwà mèbà makùmi mwandamutekète nè àbìdì, kumpàlà kwà dibola kubangadi mu mubidi awu, Ùvwa mwà kubiika ku lufù. Mèbà makùmi mwandamutekète nè àbìdì mmatùkù àsàtù à muunya nè à bufùkù. KwambaYè nè: “Ùshimbùlaayi, kàdi Mémè



mwà kulòmba Nzambi cintu kanà cyònsò, Yèyè mmufwànyine kutùpèeshaci. Wèwè udi ànu nè bwòwà cyanààna. Kùmvu bwòwà to. Yèyè's ùdi kaaba aka.

<sup>201</sup> Ndi mutwishiibwe nè Nyumà mene ùdi umvwa awu, Nyumà Mwimpè udi munkaci mwà kukwàta mudimu munda mwètù awu, ndi mutwishiibwe nè Aci n'Kilistò. Amen. Ndi mutwishiibwe nàнку mpindyewu mene, nè, Eci ke cìndi munkaci mwà kutàngila, cijèngù cyà Bukénkè cidi kumpàlà kwànyi eci, ndi mutwishiibwe nè n'Nyumà Mwimpè. Ndi mutwishiibwe nè cikèèna-kumòna aci cidi ku mèsù kwànyi. Ndi mumanyè nè ke cidiYe. Amen. Ndi ngèla démon nè démon yònsò pa buloba apa kadyòmbò, pa díbà edi. Cyà bushùwà! Yèyè ùdi Nzambi. Kilistò kèna ànu mupròfetà cyanààna to, Yèyè ùdi Nzambi, kí ncintu nànsha cimwè cyà cishàadile ku cyòci aci to.

<sup>202</sup> Twinyikàayi mitù yètù bwà katanci kakesè cyanààna. Ncyèna ànu mwà kuyiisha kàbidì to. Hum! Dilaabiibwa dyà mùshindù awu's! [Katùpà kàà mukàbà wà mèyi munda mutupù—Muf.]

<sup>203</sup> Dìna dyà Mukalenge dibèneshiibwè's wè! Mutwishiibwe mu kantu nè kantu nè Yèyè ùdi Yesù Kilistò, umwèumwè awu makèèlèlè, leelù, too nè kashidi!

<sup>204</sup> Taatù wa mu Dyulu, ndi mutwishiibwe nè ng'Wèwè. Ndi ndòmba, Nzambi, bwà nè pàndi ngùumuka pa cibumbà cyà ku cyambilu eci, dilòlò edi apa, bwà nè Wèwè newenze cintu kampàndà cyà pabwaci. Jaadikilà bantu, musangu ewu kàbidì nè, Cidi ng'Wèwè. Ndi ndàmbula batèeleji aba Kùdi. Mukalenge, tudi mu byanza Byèbè. Enzà neetù mUdi mumòne bikumbànàngane amu. Mu Dìna dyà Yesù. Amen.

Cintu kampàndà ncyenzèke. Ndi mutwishiibwe nè Nzambi ùdi kaaba aka.

<sup>205</sup> Mmwabànye twartà twà disambila anyi, kùdi twartà twà disambila anyi? [Muntu kampàndà ùdi wàmba nè: "To."—Muf.] To. Katwèna naatù dijinga to. Ndi mutwishiibwe nè Yèyè ùdi kaaba aka. Nudi nuciitabuuja anyi?

<sup>206</sup> Wèwè mutwishiibwe ànu menemene, ambà nè: "Yesù, ndi nKulenga, nè dyumvwa dyà mateketa àanyi. Ndi ngiitabuuja nè Mwanèètù Branham mmwàmbè Bulelèlè. Yèyè ùdi ànu muntu wetù ewu. Wèwè udi Nzambi. Kàdi ndi ngiitabuuja nè yèyè mmwàmbè Bulelèlè, bwalu Cidi n'Diyi. Cyènzekèku, Mukalenge. Enzàku bwà àngaakwilè nè àngambilè. Ntwishishè."

<sup>207</sup> S'ki Cyòci eci, cimanè kwikala mu disangisha emu. Inábànzà udi musòmbè pàapa wàwa, ùdi munkaci mwà kusambila bwà disaamà dyà mutù unyunguluku. Mwanèndè wa bakàji mukèsè, ùdi nendè, ùdi nè lungènyi lutàtàkàne. Newikalè mwà kuciitabuuja anyi? Maamù ùsaama kumbèlu. Ikàlà nè diitabuuja. Kwèdi mpatà to. Udi mwà kupeta cyùdi ulòmba aci.

208 Ndi mutwishiiibwe nè Mwanjèlò umwèumwè wâkapweka mu mmwènekelu wa Muntu nè kuyiikila nè Abraham awu, nè nyimà Wendè mukoma ku ntentà, n'Yéyè umwèumwè awu udi kaaba aka dilòlò edi. Wâkalaya nè nebiikalè nânku. Ndi ngiitabuuja nè Mwanjèlò umwèumwè awu ùdi ùtùlaaba maanyi, bwalu Civwa n'Nzambi. Nudi nuciitabuuja anyi? Èyo, Sarah, munwemu emu mwaba kampàndà, akùla nè Nzambi. Ndi mutwishiiibwe, mwanèètù wa bakàjì. Ndi mutwishiiibwe mwanèètù wa balùme, ndi mumanyè nè m'Bulelèlà. Ncyà bushùwà mbwôbù.

209 Kùdi inábànzà kampàndà musòmbe paanyimà pàanyi apu. Ùdi nè disaamà dyà mwoyi. Mmusòmbe ànu paanyimà pàanyi apu. Ncyèna mumumanyè to. Yéyè mmwimàne ànu kumpàlà kwànyì aku. Yéyè's mmukàjì mushindàme. Kí ngwa múnwemu to. Ngwa ku Virginie. Mandamu Fox, Yesù Kilstò ùdi ùkusàngaja. Mmusòmbe kaaba aka mene. Tùmonèbi. Nyéyè ewu, ànu *apa*. Itàbùùjà.

210 Udi witabuuja anyi? “Bu wèwè mwà kwitabuuja, bintu byònsò bìdi mwà kwenzeka.”

211 Udi wela meeji kaayì bwà bwalu abu, inábànzà? Wèwè nè mèmè katwèna bamanyàngàne, muntu nè mukwèndè anyi? Udi witabuuja nè mèmè ndi mupròfetà Wendè anyi? Mmwômò anyi? Udi nè disaamà dyà mutù. Ncyà bushùwà. Dìna dyèbè m'Màndàmù Moore. Aci ní ncyà bushùwà, elà cyaanza cyèbè muulu. Alùkilaaku kumbèlu. Òndopiibwè.

Udi witabuuja anyi?

212 Mpindyewu muntu kampàndà lwà kuulu eku, kumpàlà kwànyì eku. Nyéyè ewu, muntu kampàndà. Mmuntu mukàjì. Ùdi nè kànsèrè pa dibèèlè. Mandamu Rhodes, itàbùùjà Mukalenge Yesù Kilstò. Ncyèna mumanyè mukàjì ewu to. Nzambi ngudi mumumanyè. “Udi mwà kwitabuuja, bintu byònsò bìdi mwà kwenzeka.” Cyà bushùwà.

213 Muntu udi musòmbe kwàka wàwa, ùsambila, ngwa ku Tulsa. Mukalenge Harwood, itàbùùjà Mukalenge Yesù Kilstò. Ndaaku, ùsàngale. Ikàlà nè diitabuuja. Ke cyònsò cyùdi naaci ncyòci aci. Ncyèna mumanyè muntu ewu to, ncitukù mwànji kumumòna to kacya bândela. Katwèna bamanyàngàne to. Kàdi aci's ncyà bushùwà. Bwà cinyi? Mmulengè Cintu kampàndà.

214 Nudi batwishiiibwe anyi? [Disangisha didi dyàmba nè: “Amen.”—Muf.] Nudi batwishiiibwe nè Nzambi ùtu ùshààla mukwàte ku Dìyì Dyèndè anyi? [“Amen.”] Panwikalà batwishiiibwe, mbanganyì bàà kunùdi bàdi nè dìjinga kampàndà?

215 Mpindyewu, cyà bushùwà, bu mwàkadyàmbedilà mukàjì wa ku ciinà cyà máyì. . . Konkàayi bantu aba. Ndàayi, nùkayiikilè naabò, kwònsò kùdibo. . .

<sup>216</sup> Ndi mmòna mukwàbò. Èyowà, mukwàbò. Tèelejàayi, nùmonè ní ncyà bushùwà anyi kí ncyà bushùwà. Mpindyewu Udi munkaci mwà kunyunguluka mu nzùbu emu. Nzùbu mujimà mmulaabiibwe maanyi, mwaba wònsò nkòòng ewu. Ndi mutwishiiibwe nè Bwikadi bwà Yesù Kilstò nebwòndopè muntu yònsò udi kaaba aka ewu.

<sup>217</sup> Udi mutwishiiibwe byà mwomùmwe anyi? Nudi batwishiiibwe nè ndi nnwàmbila Bulelèlà anyi? Nzambi ùdi ùshindika nè ndi nnwàmbila Bulelèlà anyi? Dìbà adi, ndi nkutùmina díyì bwà ùjuukilè kuulu nè wìtabè dyondopiibwa dyèbè, mu Dìnà dyà Yesù Kilstò. Pawikalà mutwishiiibwe, elà byanza muulu kùdiYe, nè ùMupèèshe butùmbi.

<sup>218</sup> Taatù wa mu Dyulu, Nyumà Mwìmpè, ùjaaku nzùbu ewu. Mbatwishiiibwe nè Sàtaanà mmucimùnyiiibwe.

<sup>219</sup> Mu Dìnà dyà Yesù Kilstò, Sàtaanà, pàtukà mu mwaba ewu. Tudi batwishiiibwe nè eci m'Bwikadi bwà Yesù Kilstò kaaba aka. Nè necyènjiibwè. Amen. 

62-0610E Mutwishibwe Pashiishe Mushààle Mwena Bwalu  
Aberdeen High School  
Aberdeen, Caroline du Nord États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)